

1 CORINTIOS

Corinto marcachö criyicogcunaman apostol Pablo punta cag cartacungan

Grecia nacionpa Acaya provincianchömi Corinto marcaga cargan jatuncaray marca. Tsay marcaman Pablo manarä chaptin manam pipis tsaychö musyayarganrätsu Tayta Diospa alli willacuyninta. Tsayman chaycur Pablo willacuptinmi itsanga shumag tantiyacurir Jesucristuta waquin runacuna chasquicuyargan. Tsaychömi Pablo tärargan juc wata jogta quilla Tayta Diospa willacuyninta shumag yachatsirnin. Corintuchö Pablo canganpita masta musyanayquipä liyinqi Hechos 18.1-17.

Jesucristuta chasquicushga caycarpis Corintuchö criyicogcuna manam Diosnintsic munangannötsu cawayargan. Tsaynö carmi quiquin pura chiquinacuyargan (1.10-17; 3.1-4), yachag tucuyargan (3.18-23), Pabluta jamuräyargan (4.1-21), jutsa ruraychö caycag waugita chasquipäyargan (5.1-13), autoridäcunaman jucninpis jucninpis quejacunacuyargan (6.1-11), y majancunawan punuytapis munayargannatsu (7.1-7). Tsaynömi idulucunapa altarninchö pishtayangan aysata micuyargan (8.1-13, 10.1-pita 11.1-yag) y Pablutapis apostol cayninta imapäpis mana cuentar cayargan (9.1-27). Tsaynöllam warmicunapis gowancunata mana respitayargantsu (11.1-16), Santa Cénachöpis mana tantiyacuytam cayargan (11.17-34), Espiritu Santo imanö yanapangantapis manam tantiyayargantsu (12.1-31), cuyanacuy imanö cangantapis manam tantiyayargantsu (13.1-13), y runacuna mana tantiyangan parlaycunapam Diospa willacuyninta yachatsiyargan (14.1-40). Tsaynöllam runa wanunganpita cawamunanpä cagta mana criyiyargantsu (15.1-58).

Tsaynö lluta cawacuychö cayaptinmi paycunaman cay cartata Pablo apatsirgan shumag tantiyacuyänapä. Diospa willacuyninta runacuna mana cäsuyaptinpis paycunata Pablo tantiyatsirgan tsay willacuyta chasquicogcunata Tayta Dios salvanapä cagtam (1.18-pita 2.16-yag). Tsaynömi yachatsirgan juc runa majayog cananpä o majaynaglla cananpä cagtapis (7.8-40) y ofrendata goriyänanpä cagcunatapis (16.1-4).

Pablupa saludacuynin

1 ¹Corinto marcachö criyicog
mayicuna:

Señor Jesucristupa *apostolnin
canäpä Tayta Dios acramashga captinmi

noga Pablo waugi Sosteneswan cay
cartata gamcunaman apatsiyämü.

²Gamcunatapis Tayta Diosmi
acrayäshurguyqui paypa
munayninchöna car cuyangan
wamrancuna cayänayquipä. Tsaynö

wamrancunana cayänayquipäga Señor Jesucristo cruzchö wanuyinipam Tayta Dios perdonayäshurguyqui llapan jutsa rurayniquicunapita. Tsaynöllam maytsaychöpis payta chasquicogcunataga perdonashga.

³Tayta Diosllantsic y Señornintsic Jesucristo cuyapäcog cayninwan yanapaycuyäshuy pay munangannö cushishga cawayänayquipä.

**Jesucristuta chasquicogcunata
Tayta Dios yanapangan**

⁴Señor Jesucristuta chasquicuyaptiquim Tayta Dios imaypis yanapayäshunqui pay munanganta rurayänayquipä. Tsaytam imaypis Tayta Diosta agradebicur mañacamü. ⁵Pay yanapayäshuptiqui willacuynin tanta yacurmi musyatsicucyänanqui. ⁶Tsaynöpis Tayta Diospa willacuynin ninganman cawarmi tantiyacuyanqui willacuynin rasunpa canganta.

⁷Gamcuna Señor Jesucristo cutimunanpä cagta shuyacurnam Tayta Dios munangannö cawaycayanqui. Tsaynö cawayänayquipäga Tayta Diosmi imaycaläya graciata goyäshur yanapaycäyashunqui. ⁸Tsaynö shumagna cawayaptiquim Jesucristo cutimur tariyashunqui jutsa rurayman mana ishquiypa cawaycagta.

⁹Señornintsic Jesucristuman criyicur cawag cagtaga Tayta Dios perdonar salvayäshurguyqui aunicungannöllam.

**Jesusman criyicogcuna
chiquinacuychö mana cayänanpä
Pablo yachatsingan**

¹⁰Tsaynö Tayta Dios yanapaycäyashuptiquega çimanirtä gamcuna chiquinacuyanqui? Waugicuna panicuna, Señor Jesucristupa

jutinchömi gamcunata rugä mana chiquinacuna cawayänayquipä. Señornintsic chasquicushgana caycarga juc shongulla cuyanacur cawayay.

¹¹Cloe casta runacunam willayämashga gamcuna chiquinacur rimanacur cawaycäyangayquita.

¹²Waquinniquicunash nicäyanqui noga yachatsingäcuna mas alli canganta. Waquinniquinash nicäyanqui Apolos^a yachatsingancuna mas alli canganta o Pedro yachatsingancuna mas alli canganta. Y waquinniquicunash tsaynö parlacachagcunapita witicurna mas yachag tucucyänanqui: “Nogacunaga Jesucristupa willacuyninga masmi yachayä” nirnin.

¹³Waugicuna panicuna, tsay yarpayniquicunawanga manam allitsu caycayanqui. Jesucristoga juc llayllam, manam atscaman raquicashgatsu. Tsaynö captinmi gamcunapis mana chiquinacuyta juc yarpaylla cawayänayqui. Manam nogatsatsu, ni Apolostatsu, ni Pedrutatsu salvacuyänayquipä chasquicuyarguyqui. Manam nogacunatsu gamcunapa jutsayquicuna raycur cruzchö wanuyargö. Y manam nogacunapa juticunachötsu bautizacuyarguyqui.

¹⁴⁻¹⁶Gamcuna cagchö caycar Gayutawan Crispullatam bautizargä. Nircurmi Estefanas castacunatapis bautizargä. Tsaypita cagtaga manam pitapis bautizargötsu. Gamcuna cagchö atscagta mana bautizangäta cushicümi. Tsaynö atscagta bautizaptipis capazmi masrä chiquinacuyanquimanpis cargan: “Pablo bautizayämangan cagmi masga välin” nirnin. ¹⁷Manam runacunata bautizar purinäpätsu Señor Jesucristo nogata acramashga, sinöga

willacuyninta willacur purinäpämi.
Tsay willacuynintaga willacü manam
yachag cangäta runacuna
niyamänapätsu, sinöga Jesucristuta
chasquicuyänapämi. Yachag tucur
parlaptëga nogallatanam
alabayämanman. Tsaynö captin
runacunapäga Jesucristo cruzchö
wanunganpis manam cuentachötsu
canman.

**Diospa willacuyninta runacuna
llutaman cuentayaptinpi
tsayllawan salvacuyänapä
willangan**

¹⁸Señor Jesucristo salvamänantsicpä
cruzchö wanunganta willacuptimi
waquin runacuna niyan
manacagcunallata parlar puriyangäta.
Jesucristuta mana
chasquicuyanganpitam paycunataga
Tayta Dios infiernuman gaycunga.
Chasquicogcunatam itsanga
salvamäshun. ¹⁹Tsaynö rurarninmi
Tayta Dios cumplycan palabran
gellgaranganchö caynö ningannölla:

“Yachag runacunapa
yarpaynincunata manam
imapäpis cäsütsu.

Imaycatapis alläpa
yachayangallanwanga manam
imanöpapis salvacuyangatsü”
nir.

²⁰Tsaynö nicaptinga ñimapätä välin
yachag cayanganpis? Mayläya yachag
cayaptinpi Tayta Diosga nirgan tsay
yachag runacunapa yachatsicuyllanta
chasquicurga pipis mana
salvacuyänapä cangantam. ²¹Noga
willacungä llutancunalla canganta
yarpäyaptinpi tsay willacuyta
chasquicogcunataga Diosnintsic
salvashganam.

²²Tayta Diospa willacuyninta
chasquicuyänapäga *Israel runacuna
milagrucunatarämi ricayta munayan.
Mana Israel cag runacunapis munayan
yachatsicognincuna yachatsiyangannöra
nogacunapis yachatsiyänäta. ²³Tsaynö
munayaptinpi nogacunaga manam
yarpäyangannötsu yachatsicuyä, sinöga
Señornintsic Jesucristo nogantsic raycur
cruzchö wanungallantam willacur
puriyä. Tsayta willacur puriyaptimi
Israel runacunaga ajäcuyan caynö
nirnin: “Diospa tsurin caycarga
ñimanöpatä cruzchö wanunman
cargan?” nir. Mana Israel cag
runacunanam yarpäyan manacagcunata
yachatsicuyäyangäta.

²⁴Tayta Dios acrangana cagcunam
itsanga Israel runacuna carpi mana
Israelcuna carpi noga willacungätaga
cushishgalla chasquicuyan. Paycunaga
tantiyayan Jesucristuta chasquicuyaptin
Tayta Dios salvanapä cagtam. Tsaymi
Jesucristupa willacuynintaga
chasquicuyan milagrucunata mana
ricarpis y yachag runacunapa
yarpaynincunaman mana
yachatsiyaptipis. ²⁵Tsay willacungäcuna
mana yachag runacunallapä canganta
yarpäyaptinpi tsay willacuyta
chasquicogcunataga Tayta Dios
jutsancunapita perdonanmi. Tsaynömi
Señor Jesucristo cruzchö wanunganta
runacuna ni imapä mana
cuentayaptinpi willacuyninta
chasquicogcunataga Tayta Dios
perdonan.

**Yachag canganpita ni quiquinpa
munayllanpita pipis mana
salvacuyänapä willangan**

^{26,27}Waugicuna panicuna, mana
yachag, ni mana rïcu, ni imaycawanpi
munayyog mana cayangayquipita
runacuna mana väleqpä

cuentayäshuptiquipis gamcunataga Tayta Diosmi acrayäshurguyqui salvashga cayänayquipä. Fisyu final junagchö gamcuna salvashga caycagta ricaycuyäshurniquim tsay mana välegpä cuentayäshogcuna pengacuyanga.

²⁸Paycuna manana salvacurnam tantiyacusquiyanga yachag ni puëdeg caynincuna imapäpis mana välinganta.

²⁹Tsaynö captin Tayta Diospa ñöpanchö caycarga manam pipis alabacunganatsu: “Yachag cangäpitam nogataga Tayta Dios salvamashga” nirnin.

³⁰Nogantsicga manam yachag cangantsicpitatsu salvacurguntsic, sinöga Señor Jesucristo jutsantsic raycur cruzchö wanunganpitam. Tsaynöpam jutsantsiccunapita Tayta Dios perdonamarnintsic jutsaynagtanöna ricaycämantsic. Nircurnam munayninchöna catsimantsic allina cawanantsicpä. ³¹Tsaynö captinmi *Diospa palabran willacunganchöpis caynö nimantsic: “Pipis quiquin alabacunanpa rantinga Tayta Diosta alabatsun” nir.

Diosnintsic yarpangancunata Espiritu Santo tantiyatsingan

2 ¹Waugicuna panicuna, gamcunawan caycarnin Tayta Diospa willacuyninganta yachatsirgö manam aja palabracunawantsu, sinöga llapayquipis tantiyacuyangayqui cag palabracunawanmi. ²Tsaynöpis yachatsirgö Señornintsic Jesucristo jutsantsic raycur cruzchö wanunganam. ³Tsay yachatsingäcunata Tayta Dios wiyaycämanganta musyarmi nogaga Jesucristupa willacuyllanta allillata yachatsirgö. ⁴Gamcunata tsay willacuyta willapargö manam quiquipa yarpaynëpitatsu, sinöga *Espiritu Santo yanapamaptinmi. ⁵Y gamcunata willapaptinam Espiritu Santo

yanapayäshurguyqui Jesucristuta chasquicuyänayquipä.

⁶Llutancunata yachatsicungäta waquin runacuna yarpäyaptinpis Jesucristuta chasquicogcunam itsanga tantiyacuycäyan rasun cagllata Tayta Diospa willacuyninganta yachatsicungäta. Tsay willacuyga manam yachag runacuna ni puëdeg runacuna imaycatapis yarpäyangannötsu, sinöga Tayta Dios jutsancunapita perdonar salvananpä cag willacuymi. Paycunaga tsay willacuyta mana chasquicuyanganpitam Tayta Diospa castigunpita geshpiyangatsu. ⁷Tsay yachag runacuna yarpäyangannö mana captinpis Tayta Diospa willacuyninga Señornintsic Jesucristo cruzchö wanunganpita imayyagpis gloriachö cawanantsicpä willacuymi. Gloriaman pushamänantsicpä cagtaga Tayta Dios yarpargan manarä cay patsata camarmi. ⁸Cay patsachö puëdeg mandacogcunaga manam tantiyayargantsu Tayta Dios tsaynö yarpangancunata. Tsayta tantiyarga autoridäcuna manam Jesucristuta cruzchö wanutsiyanmantsu cargan.

⁹Tayta Diospa palabran gellgaranganchöpis caynömi nin:

“Pipis mana ricanganta, ni mana wiyanganta, ni mana yarpangantam payman criyicogcunapä Tayta Dios ciëluchö alistashga caycätsin” nir.

^{10,11}Tsay autoridäcuna mana tantiyayaptinpis nogantsictaga Espiritu Santum tantiyatsimarguntsic Tayta Diospa salvacionninta alcanzanapä cagta. Runacuna shongunchö imatapis yarpäyanganta quiquincunalla musyayangannömi Espiritu Santupis

musyaycan Tayta Diospa imayca yarpaynincunata. ¹²Tsaymi Espiritu Santuta chasquicushga cagcunaga tantiyaycantsic Tayta Dios cuyamarnintsic jutsantsicipita perdonamangantsicta. Espiritu Santuta mana chasquicogcunam itsanga tsaycunataga tantiyayantsu.

¹³Gamcunata tsaynö willapaycä manam quiquipa yarpaylläpitatsu, sinöga Espiritu Santo tantiyatsimangannöllum. ¹⁴Espiritu Santuta mana chasquicogcunaga manam tantiyayantsu Tayta Diospa willacuyninta runacuna imapä chasquicuyanganta. Paycunaga yarpäyan tsay willacuynin imapäpis mana välingantam. ¹⁵Espiritu Santuta chasquicogcunam itsanga tantiyacuyan Tayta Diospa willacuynin salvananpä cagta. ¹⁶Tayta Diospa willacuyninta mana tantiyagcunapäga palabran gellgaranganchöpis caynömi nin:

“¿Pirä Tayta Dios yarpangancunata tantiyanman?

¿Pirächi payta yachatsinman?” nir.

Tsay gellgarangannöllum mana tantiyayantsu Tayta Diospa willacuyninta chasquicur salvacuyänapä cagta. Nogantsicmi itsanga tantiyacuntsic salvacionta tarinapä cagta y Señor Jesucristo yarpangannö cawaycangantsicta.

Jesucristuman criyicogcuna chiquinacur raquicäyangan

3 ¹Waugicuna panicuna, tsaynö captinpis gamcunaga cayanqui pishi wamracuna imatapis mana tantiyacognömi. Espiritu Santo munangannö cawayänaquipä cagta manarä tantiyacuyaptiquim gamcunawan caycar aja tantiyatsiy

wamracunatanöpis shumag yachatsirgä.

²Juc llullu wamrata manarä micuyta gararnin chuchullawanrä maman shacshatsegnömi nogapis gamcunata gallaycunan cag yachatsicuycunallatarä yachatsirgä. Cananyagpis tsay llullu wamranömi munayniquicunallachörä cacucyäyanqui. ³Gamcunaga Señor Jesucristuta manarä chasquicog runacunanömi imaycatapis munayangayquita rurayllachörä cawacuyta munaycäyanqui. Chiquinacur rimanacur Jesucristuman mana criyicog runacunanöllum cawaycäyanqui. ⁴“Nogacunaga Pablo yachatsicungantam chasquicuyä” o “Apolos yachatsicungantam masga chasquicuyä” nirnin chiquinacuycäyanqui. Tsaynö chiquinacurga Jesucristuman mana criyicog runacunanöllum cawaycäyanqui.

⁵Tsaynö niyämänaquipäga ¿pitä cä nogaga? Tsaynöpis ¿pitä Apolosga? Nogacunaga Tayta Diospa willacogllanmi cayä. Paypa willacuyninta willacuyapti manam nogacunatatsu chasquiyämarguyqui, sinöga Señornintsic Jesucristutam. ⁶Juc murucog runa murucungan cuentallam gamcunata nogaga Tayta Diospa willacuyninta willapargö Jesucristuta chasquicuyänaquipä. Murucuyta garpag cuentanam Apolosga tsay alli willacuytaga maslla tantiyatsiyäshurguyqui. Tsaynö captinpis murucunintsicta Diosnintsic jegarcatsimur wiñatsingannömi gamcunataga quiquin Señorllantsic tantiyacätsiyäshunqui yäracuyänaquipä. ⁷Manam nogantsictu murucunintsictaga wiñatsimuntsic. Tayta Diosmi jegatsimun y wiñatsin. Tsaynömi willacuyninta chasquicuyänaquipäpis

Tayta Diosllantsic munayyog caycan, manam nogatsu ni Apolostsu.

⁸Murucog cagpis garpapag cagpis murucuynin shumag wayunanpä arungannömi nogapis Apolospis Tayta Dios munangannö cawayänayquipä yachaycätsiyä. Chacrachö arogcuna aruyanganpita päguta chasquiyangannömi nogapis y Apolospis gloriaman charnin chasquiyänäpä cagtaga chasquiyäshä. ⁹Nogacunaga chacrachö arogpä mincaycunanöpis Tayta Diospa willacogllanmi cayällä. Gamcunanam Tayta Dios aruycätsingan chakra cuenta caycäyanqui. Tsaynö cayanqui manam quiquipa willacuynita willacungäpitatsu ni Apolos quiquinpa willacuyninta willacunganpitatsu, sinöga Jesucristupa willacuyninta willacuycangäpitam.

**Jesucristuman criyicogcuna Tayta
Dios sharcaycätsingan wayinö
cayangan**

Tsaynöpis gamcunaga cayanqui Tayta Dios sharcaycätsingan wayinömi. ^{10,11}Señornintsic Jesucristunam wayipa cimientun cuenta caycan. Nogaga Jesucristupa willacuyninta willacog car wayipa cimientunta sharcatseg cuentam caycä. Gamcunatanam Tayta Dios yanapaycäyashunqui tsay cimientu jananman wayita sharcatseg albañil cuenta cayänayquipä. ¹²Señornintsic Jesucristo munangannö cawarninga öruwan, gellëwan, cuyayllapä chipipeg rumicunawan wayita sharcaycätseg cuentam caycäyanqui. Señor Jesucristo munangannö mana cawag cagcunam itsanga caycäyanqui wayita geruwan, ogshawan, rämacunawan ruraycag cuentalla.

¹³Fisyu final junagmi imanöpis cawangantsicman Diosnintsicga juzgamäshun. Tsay junagmi

musyacanga allita o mana allita rurar cawangantsicpis. ¹⁴Diosnintsic munangannö shumag cawashga carninga gloriachömi premiuta chasquishun. ¹⁵Gamcunachö waquinniquicunaga llutan rurag cayangayquipitam gloriaman aywarpis Diosnintsicpita ni ima premiutapis chasquianquitsu. Tsaynö captinmi wayita nina ushaycaptin runa salvacurnin imaycanöpa geshpegnö apënas salvacuyanga.

^{16,17}Gamcuna yachag tucur Jesucristuta chasquicog mayiquicunata imapäpis mana cuentarnin paycunachö caycag Espiritu Santutapis manam ni imapä cäsuycäyanquitsu. Tsaynö cagcunataga pitapis Tayta Dios infiernumanmi garpunga.

**Jesucristuman criyicogcuna mana
yachag tucuyänanpä yachatsingan**

¹⁸Tsaynö captinmi shumag tantiyacuyänayqui mana yachag tucog cayänayquipä. Yachag cayangayquillata yarpäyänayquipa rantinga mana yachag tucuyä cawayay. Tsaynö cawarga Tayta Dios munangannö cawayänayquipä cagtam tantiyacuyanqui. ¹⁹Yachag tucog runacunataga Tayta Dios imapäpis manam cuentangatsu. Tsaynö cananpä cagtaga palabran gellgaranganchöpis ninmi: “Tayta Diosga yachag tucogcunata pengaymanmi churanga” nir. ²⁰Nircurpis caynö gellgaraycanmi: “Tayta Dios musyaycanmi yachag runacuna manacagcunata yarpaycäyanganta” nir. ²¹Tsaynö nicaptinga runacuna ama yachag cayangayquillamanga yäracuyaytsu. ^{22,23}Nogapis, Apolospis, Pedrupis Señor Jesucristupa willacogllanmi cayä. Gamcunataga Jesucristum salvayäshurguyqui. Payga Tayta

Dioswanmi caycan. Tsaymi cawarpis wanurpis ima päsayäshuqtiquipis salvacionta tariyänayquipäga Jesucristullaman yäracuyänayqui.

**Criyicogcuna Pabluta
jamuräyaptinpis mana
llaquicungan**

4 ¹Nogapis, Pedrupis, y Apolospis Señor Jesucristupa willacognin cayangallätam tantiyacuyänayqui. Tsayta tantiyacur manam nogacunamantsu yäracuyniquicunata churayänayqui. Tayta Diosmanmi yäracuyänayqui willacuyninta chasquicur salvacuyänayquipä. ²Nogata Señornintsic Jesucristo willacognin canäpä churamashga captinmi pay munangannölla willacucyä. ^{3,4}Jesucristupa mana alli willacognin cangäta gamcuna niyaptiquipis manam cäsütsu. Manam gamcunatsu niyämänqui alli o mana alli willacognin cangätaga, sinöga Señornintsicllam.

⁵Tsaynö caycappinga Jesucristupa willacognincunata ama jamuräyanquitsu. Señornintsic Jesucristo cutimurnam juzganga allipis o mana allipis willacognin cayangantaga. Señornintsic juzgamangantsic junagmi nimäshun pacayllapa jutsa ruraynintsicunata y shonguntsic imata yarpangancunata. Munangannö cawagcunataga chushicurninmi premiuta gomäshun.

⁶Gamcunaga waquin cag criyicog mayintsicunatam aqishapäyanqui: “Apolos yachatsingancunata yachacuyänayquipä nogacunaman shacayämuy. Payga Pablupitapis masmi yachan” nirnin. Waugicuna panicuna, Diospa palabrantä rasunpa cäsucurga manam tsaynö niyanquimantsu.

⁷Tsaynö juccunata niyänayquipäga çpitä gamcunata tsaynö

sharcatsipäyashurguyqui? ¿Ima cayangayquita yarparnatä gamcunaga waquin cagcunata manana imapäpis cuentayanquinatsu? Gamcunaga yarpaycäyanqui yachag cayangayqui quiquillayquicunapita cangantam. Rasunpa yachag carga tantiyacuyanquimanmi Tayta Diospitärä ima yachaytapis chasquicuyangayquita. [Tsayta tantiyacurga manam pitapis alli tupar cayanquimantsu.]

⁸Tsaynö caycappinga çimanirtä yarpäyanqui alläpa yachag cayangayquita? ¿Ima cayangayquitatä gamcuna yarpäyanqui? ¿Rey cayangayquita yarparcu gamcunaga manana imapäpis cuentaycayämänquinatsu? ¡Ojalä maynapis rey caycäyanquiman nogacunapis gamcunanöna rey cayänäpä! ⁹Nogapa yarpaynichöga apostolcunata Tayta Dios churayämashga pipita maypitapis mas ñacayänäpämi. Llukan rurag runacunatanöpis nogacunataga wanutsiyämaytam munayan. Tsaynö imayca ñacacuyta päsayangätaga runacunapis *angelcunapis ricaycäyämänmi. ¹⁰Señor Jesucristo salvacog canganta willacur puriyaptämi runacuna yarpäyan imatapis mana musyaycar llutalla puricuyangäta. Tsaynömi imaycachö ñacar puriyaptipis runacuna yarpäyan imapäpis mana väleg cayangäta. Y hasta gamcunapis tsaynömi yarpaycäyanqui. Tsay yachatsiyangäpita runacuna burlacayämar asicuyaptinpis gamcunam itsanga alli respitashga cayanqui.

¹¹Cananyagpis nogacunaga ñacayta päsayargö mallagar, yacunar, röpäcuna ushacaptin shillpar, y runacunapitapis magacar ushashgam. Wayicunapis ni imäcunapis manam quiquicunapaga cantsu. ¹²Ima miñishtiyangäcunapäpis

uticäyangäyag quiquicunarämi arucuyä. Runacuna imaycata ashlliyämaptinpis mana contestaypam Tayta Diosman mañacuyä paycunata perdonaycunanpä. Tsaynömi maytsaychöpis runacuna chiquir gaticachäyämaptinpis mana wamayaypa ni mana llaquicuyä puriyä. ¹³Wasäcuna rimayaptinpis nogacunaga alli shimicunallapam parlapäyä. Cananyagpis nogacunataga imapämis mana väleg runatanöllum ricayäman. Señor Jesucristuta chasquicushga carmi imaycatapis awantacuyä.

¹⁴Jesucristuman criyicuyänayquipä willapashga carmi gamcunapaga taytayquicuna cuenta caycä. Tsaynö carmi gamcunata cuyarnin cay cartata apatsimü shumag tantiyacuyänayquipä, manam pengacuyman churanäpätsu. ¹⁵Chunca waranga (10,000) yachatsiyäshogniquicuna cayaptinpis nogami puntataga willapargö Señor Jesucristuta chasquicuyänayquipä cagtaga. Tsaynö punta willapäcog carmi gamcunapaga taytayquicuna cuenta caycä. ¹⁶Tsaymi gamcunata yätsi noga cawangänö Tayta Dios munanganman cawacuyänayquipä. ¹⁷Gamcunachö car imanö cawangätapis yarpätsiyäshunayquipämi Timoteuta gamcunaman cachamü. Payga Tayta Dios munangannö cawarmi nogapapis tsuri cuenta caycan. Tsaymi maytsaychöpis noga yachatsicungänö gamcunatapis shumag yachatsiyäshur tantiyatsiyäshunqui.

¹⁸Waquinniquicunaga watucagniquicuna mana shamunäpäna cagta yarparsi pasaypa yachag tucurna conträ sharcuyarguyqui. ¹⁹Tsaynö yarpäyaptiquipis Tayta Dios yanapamaptinmi gamcunaman watucagniquicuna shamushä. Tsayhömi tsay yachag tucocuna

musyayämanga. Paycunaga shimincuna camacanganman parlarmi Tayta Dios munangantaga rurayantsu.

²⁰Diosnintsicpa munayninchö cawayga manam yachag tucur parlacachaytsu, sinöga pay munanganta rurar jucläyana alli cawaymi. ²¹Gamcunaman shamur manam pitapis lisu tupayta munätsu. Mana lisu tupar chämunäpä Diosnintsic munanganman shumag cawayay. Tsaynö allina cawayaptiquega gamcunaman shamurnin cushicushämi.

**Madrestanwan yachag runata
criyicocguna goricäcuyanganpita
garguyänanpä Pablo ningan**

5 ¹Noga musyargömi gamcunachö juc runa madrestanwan taycanganta. Tsaynö ruraycanganga imanö pengacuyä jutsam. Tayta Diosta mana cäsucog runacunapis tsaynö jutsa rurag runataga jamuräyanmi. ²Tsaynö caycappinga imanirtä waquinniquicunaga tsay runata chasquiyäcayanqui? Payta chasquiparninga yarpaycayanqui Tayta Dios munangannö ruraycayangayquitam. Tsay nirag runata chasquipäyänayquipa rantinga imanirtä tantiyatsiyanquitsu jutsa rurayninta mana dejaptin goricayangayquiman mana consientiyänayquipä cagta?

³Gamcuna cagchö manarä carpis yarpachacurgönam tsay runa gamcunawan mana juntacänanpä cagta. ⁴Canaga gamcunapis Señorintsic Jesucristupa jutinchö juntacar willanacuyay yätsingänölla tsay runata goricayangayquicunachö mana consientiyänayquipä. ⁵Tsaynö mana consientiyaptiquinam *Satanas yarpachacuychö catsiptin tantiyacuyman changa llutan rurayninpita. Tsayta tantiyacur jutsanta

jagiriptinga Jesucristo cutimuptin salvacungam.

⁶Tsay runa allita ruraycanganta yarpas chasquiparga ama yarpäyaytsu Diosnintsic munangannö gamcunapis cawaycäyangayquita. “Wallca levadürallam mäsataga jacatsin” niyangannöllum tsay jutsachö cawacog runata mana tantiyatsirga quiquiucunapis jutsaman ishquiyäyanqui.

⁷Musyayangayquinöpis *Pascua fiestachö Israel runacuna levadürataga wayincunapita jitariyanmi. Tsaynöpam gamcunapis llapan jutsa rurayniucunata jagiriyäyanqui. Jutsata manana ruraypa canantsicpämi nogantsic raycur Señor Jesucristo wanushga, Pascua fiestapä carnishta wanutsiyangan cuenta.^b ⁸Tsaymi jutsayquicunata jagirir Diosnintsic munangannöna cawayäyanqui.

⁹Punta cag cartacamuyñichöpis nimurgänam jutsa rurag runacunawan mana juntacäyänayquipä cagtaga. ^{10,11}Peru manam llapan runacunapita witicuyänayquipätsu tsaynöga nimurgä, sinöga Jesucristuman criyicog tucur jutsallachö cawag runacunawan mana juntacäyänayquipämi. “Jesucristutaga chasquicuyargönäm” nicarpis paycunaga chinäcuyllachömi cawayan, imaycapäpis mallagashgam caycäyan, Diosta mana cäsuyä *idulucunaman yäracurmi cawayan, runa mayinpa wasanmi rimayan, machäcuyanmi, y suwacuyanmi. Tsay nirag runacunawan micuyänayquillapäpis mana goricäyänayquipämi punta cag cartächöpis yätsimurgä. Tsaynö nishga captäpis Diosnintsicman mana criyicog cag runacunapita ama witicuyaytsu.

Cawaycangantsicyagga paycunawanpis juntacaycäshunrämi.

^{12,13}Manam ima munayyogtsu cantsic Señor Jesucristuman mana criyicog runacunata juzganantsicpäga. Paycunataga quiquin Tayta Diosmi juzganga. Criyicog mayintsiccuna jutsa rurayta mana dejayaptinmi itsanga juzganantsicpä y gargunantsicpäpis munayyog caycantsic. Tsaymi madrestanwan cacog runataga goricäyangayquipita garguyäyanqui.

Autoridäcunaman quejanacuy mana alli cangan

6 ¹Gamcuna imaycallapitapis rimanacurirga imanirnatä quejacogna aywaraycäyanqui autoridäcunaman? Tsaynö aywayänayquipa rantinga imanirtä quiquiucuna pura arreglayanquitsu? ²¿Gamcuna manacu musyayanqui Jesucristuta mana chasquicog runacunata juzganantsicpä Tayta Dios churamänantsicpä cagta? Tsaynö caycaptinga imanirtä quiquiqui pura arreglayanquitsu? ³Y tsaynölla imanacu musyayanqui angelcunatapis juzganantsicpä cagta? Tsaynö canantsicpä caycaptinga imanirtä mana arreglashwantsu rimanacurirpis quiquintsic puralla? ⁴Waugicuna panicuna, gamcuna imata rimanacurirpis aywaraycäyanqui Señornintsic Jesucristuta mana cäsucog autoridäcunamanran arreglayäshunayquita munar. ⁵¿Manacu gamcunachö pillapis can tsaynö rimanacuyaptiqui arreglayäshunayquipä? Quiquiqui pura arreglayänayquipa rantin pengacuypämi quejanacur autoridäcunachörä gamcuna

b 5.7 Pascua fiestachö Israel runacuna carnishta wanutsiyanganpita masta musyayänayquipä liyinqi Exodo 12.3-14.

puriycāyanqui. ⁶Tsaynō rīmanacuychō car gamcuna mana allim cawaycāyanqui. Nircurpis pengacuyānayquipa rantinmi Diosnintsicta mana cāsucog autoridācunamanrā aywaycāyanqui quejanacurnin.

⁷Autoridācunaman quejacur gānayaptiquipis Diosnintsicta mana cāsucog runacunaga jamurāyāshunquim. Tsaynō caycaptīnga ajātsinacurpis ĩmanirtā jucnīqui jucnīquipis upāllacuyanquitsu? Suwapāyāshuptiquipis ĩmanirtā “Jina apacutsunpis. ĩmanashātā?” niyanquitsu? ⁸Nagana Señornintsic Jesucristuta chasquicushgana caycarga ĩmanirtā gamcuna rabyatsinacur suwapānacur cawaycāyanqui?

⁹ĬManacu gamcunaga musyayanqui jutsa ruraychō cawacog runacuna gloriāman mana chāyānanpā canganta? Manam Tayta Diospa ñōpanman chāyangatsu ollgupis warmipis lluta majanwannōpis cacogcuna, Diosta mana yarpar ĩdulucunaman yāracogcuna, majanta engañar adulteriu jutsata ruragcuna, ollgu mayinwan warmiwannōpis punucogcuna, ¹⁰suwacogcuna, imaycapā mallagashgacuna, machācogcuna, wasarimacuna, y sacyapacogcuna. Tsaynō jutsa rurag runacunaga manam mayganpis gloriāman chāyangatsu. ¹¹Gamcunapis waquinniquega tsay jutsa ruraycunallachō cacog runacunanōllam cawacuyargayqui. Tsaynō cawaycāyaptiquim Espiritu Santo tantiyatsiyāshurguyqui Señornintsic Jesucristuta chasquicuyānayquipā cagta. Canan Jesucristuta chasquicuyaptiquinam llapan jutsayquicunata Tayta Dios perdonayāshurguyqui paypa munayninchōna cawayānayquipā.

Jutsa rurag warmicunawan mana tincucānantsicpā willacungan

¹²Waquinniquicunaga niyanqui: “Salvacionta tarishgana caycaptēga ima jutsata ruraptipis Tayta Dios manam castigamanganatsu” nir. Tsaynō yarparpis manam munangantsicta rurarga cacushwantsu. ¹³Waquin runacunaga niyan: “Wanucunantsiclla caycaptīnga cawangantsicyag micushun upyashun” nir. [Tsaynōllam juccunapis niyan: “Wanungallantsicchō ushacācuna caycaptīnga cawangantsicyag gōzacushun. Chīnācur puricushun” nir.] Waugicuna panicuna, imanam tsay runacuna yarpāyangannōtsu! Manam jutsa rurayllachō warmicunawan lluta puricunantsicpātsu Tayta Dios cuerpuntsicta camamarguntsic, sinōga pay munangannō cawanantsicpāmi. ¹⁴Tsay runacuna yarpāyangannō manam wanungallantsicchōtsu dejaramāshun, sinōga poderninwan Señor Jesucristuta cawatsimungannōllam nogantsictapis cawatsimāshun.

¹⁵ĬManacu tantiyayanqui Señor Jesucristuta chasquicur Tayta Diospa wamran caycangantsicta? ĬTsaynō Tayta Diospa wamran caycarnatsurā jutsa rurag warmicunawan punushwan? iWaugicuna, tsaytaga ama rurayaytsu! ¹⁶ĬManacu gamcuna musyayanqui juc warmiwan adulteriu jutsata rurar tsay örapitaga warmiquinōna caycanganta? Majayogcunapāga Diospa palabran gellgaranganchōmi nin: “Nagana majatsacarga juc casta juc casta caycarpis mushog castamannam ticrarin” nir. ¹⁷Tsay ningannōllam Jesucristuta chasquicogcunaga Tayta Diospa wamranna ticrarin. Tsaynō Tayta Diospa wamranna caycarga ĩmanirtā jutsa rurag warmicunawan cacuyanqui?

^{18,19}¿Manacu musyayanqui Tayta Dios cachamungan Espiritu Santo gamcunachö captinna paypa täcunan templu caycäyangayquita? Tsaynö caycarga majayquicunawannö ama piwanpis punucuyaytsu. Tsay jutsacunata rurarga Espiritu Santuta manam imapäpis cuentaycäyanquinatsu. ²⁰Tayta Dios gamcunataga Señor Jesucristupa yawarninwanmi rantiyäshurguyqui. Tsaynö caycappinga pay munanganta rurallarnam cuerpuyquicunata mana ganrataypa cayänayqui.

**Majatsacashgacuna mana
michänacuyapa cuyanacuyänapä
yätsingan**

7 ¹Canan tantiyatsiyäshayqui gamcunapis cartayquicunachö tapucayämangayquita. Tsay cartayquicunachöga gamcuna niyämarguyqui juc runa majanwan punur jutsata ruraycanganta yarpäyangayquitam. ²Tsaynö niyaptiquipis manam tsaypis tsaynötsu. Majayog cagcunaga majancunawan ama dejanacuyätsuntsu. Majayquicunawan dejanacurtä adulteriu jutsaman ishquicyäyanquiman, warmipis ni ollgupis.

^{3,4}Pi warmipis runantaga cuerpunta ama michätsuntsu. Tsaynölla pi runapis warminta cuerpuntaga ama michätsuntsu. Tsay michänacuyänayquipa rantinga ollgupis warmipis shumag cuyanacuyay. ^{5,6}Tsaynöna carninga gamcuna mananam cuerpuyquicunata michänacuyänayquinatsu. Majayquicunawan shumag cawarga willanacuyänayqui imaychörä tincucäyänayquipäpis. Nircur tsay willanacuyangayqui junagyagrämi awantacuyänayqui. Waquincunaga tsaynö

shumag willanacurirmi ayünumanpis yaycuyan. Tsay junagcunachöga imapäpis mana yarpachacuyllapam Tayta Diosman mañacullar goyácuyanman. Tsaynö nirpis manam nogaga obligaycä imätsu ayunayänayquipäga “Mana tincucayparä cayay” nirnin. Gamcunapitam tsayga. Imanö captinpis tsay willanacuyangayqui junag cumpliriptinga majayquicunawanga tincucäcuyay. Majayquicunawan mana tincucäyaptiquega Satanas jucwannapis jutsataga ruratsiyäshunquiman.

⁷Nogapa yarpaynäpita llapayquicuna noganö majaynaglla cacuyaptiquipis allim canman. Imanö captinpis Tayta Diosmi permitishga majayog o majaynag canantsicpäpis.

**Majaynagcuna y majayogcuna
imanö cawayänanpä yätsingan**

⁸Viüdacunatawan viüdacunataga noga yätsi noganöpis majaynaglla täcuyänanpänam. ⁹Tsaynö niptipis japalla täcuyta mana camäpacur majayog cayllapä yarparaycäyänanpa rantinga majancunaga mejor ashicuyätsun. Tsaynö majayogna captinga manam imapis jutsatsu.

¹⁰Majayogcuna majancunapita ama raquicäyätsuntsu. Pipis majanpita mana raquicänanpämi Señornintsic Jesucristupis nirgan. ^c¹¹Tsaynö captinpis gowanpita juc warmi raquicar imarga mana yapapacuyllapana täcutsun. Japallan täcuyta mana camäpacurga gowanwan cangan amishtacutsun. Tsaynölla ollgu cagpis warminpita ama raquicätsuntsu.

¹²Espiritu Santo tantiyatsimaptin caynömi ni: Criyicog runapa warmin mana criyicog caycarpis gowanpita raquicayta mana munaptinga manam tsay runa

c 7.10 Majayogcuna majancunapita mana raquicäyänanpä Jesucristo ninganta masta musyanayquipä liyinqi Mateo 5.32; 19.9; Marcos 10.11,12; Lucas 16.18.

warminpita raquicänantsu. ¹³Tsaynölla juc criyicog warmipa gowan mana criyicog caycarpis mana raquicayta munaptinga tsay warmi gowanpita manam raquicänantsu. ¹⁴Señor Jesucristuman mana criyicog runa juc criyicog warmiwan targa èllum tantiyacur paypis Jesucristuta chasquicunman. Tsaynömi warmi cagpis Jesucristuman criyicog runawan targa tantiyacur Jesucristuta chasquicunman. Tsaynöpaga wamrancunapis taytan o maman alli cawagta ricar Jesucristuta chasquicuyanmanmi.

¹⁵Tsaynö captinpis ollgu cag o warmi cag Jesucristuman criyicog captin jucagnin criyicog cayman mana yaycuyta munar aywacuytä wanuptinga ama michätsuntsu aywacunanta. Tayta Diosga munan majayogcuna majancunawan shumag cawayänantam, manam chiquinacuyllachö cawayänantaga munantsu. ¹⁶Peru mana raquicarnin imarga ollgu cagpis o warmi cagpis èllum Jesucristuta chasquicunman salvacunapä. ¹⁷Imanö carpis Jesucristuman criyicogna caycarga ama yarpäyaytsu majayquicuna mana criyicuptinpis paypita raquicaytaga. Tsaypa rantinga majayquicunawan cuyanacur alli cawacuyay Jesucristuman criyiptin o mana criyiptinpis. Gamcunata yachatsingänöllum maytsaychöpis Jesucristuman criyicog mayicunata yachatsicuytä.

**Señalacushga carpis mana
señalacushga carpis Jesucristo
munangannölla cawanantsicpä
yätsingan**

¹⁸Caynöpis tantiyacuyänayquitam munä. *Cuerpuyquicunata mana señalacuypa Jesucristuman criyishga carga ama yarpachacuyaytsu señalacuyänayquipä cagtaräga. Y cuerpuyquicunata señalacushgana Jesucristuman criyicushga carga ama

pengacuyaynatsu señalacuyangayquita. ¹⁹Señalashga cayangayqui y mana señalashga cangayquipis Diosnintsicpäga iwalllam. Itsanga Diosnintsicga munan señalashga o mana señalashga carpis payta cäsür cawayänayquitam. ²⁰Jesucristuta chasquicushgana caycarga ama llaquicuyaytsu señalashga o mana señalashga cayangayquitapis.

**Esclävu carpis mana esclävu carpis
Jesucristo munangannölla
cawanantsicpä yätsingan**

²¹Tsaynölla juc runapa maquinchö esclävu caycar Jesucristuman criyicushga carga ama llaquicuyaytsu tsaynö esclävu cayangayquita. Peru tsaynö caycayangayquipita pillapis pägacuycur jipiyäshuptiquega yargucuyay. ²²Esclävu carpis o mana carpis Jesucristuta chasquicushgana carga paypa maquinchönäm caycäyanqui. ²³Señor Jesucristupa yawarninwan pägacuycurmi gamcunata Tayta Dios rantiyäshurguyqui. Tsaymi Tayta Diospa carna jutsata mana rurayllapana cawayänayqui. ²⁴Majayog carpis mana majayog carpis, señalashga carpis mana señalashga carpis, esclävu carpis mana esclävu carpis gamcunaga Tayta Dios munangannöllum imaypis cawayänayqui.

**Majayog cayänanpä o japalla
täcuyänanpä cagta yachatsingan**

²⁵Japalla cagcuna majayog cayänanpä o mana majayog cayänanpä cagtaga Señornintsic Jesucristo manam yachatsicushgatsu. Peru apostolnin canäpä acramashga captinmi nimü: ^{26,27}Cay imayca ñacaycunachö mas mejormi japalla cagcunaga japallana täcuyanman. Tsaynö captinpis nagana majayogna cagcunaga ama majanpita raquicätsunnatsu. ²⁸Pipis majan ashicurga manam ima jutsatapis

uraycan imantsu. Tsaynöllä jipashcunapis täcuyänapä juc runata auniparga ima jutsatapis manam ruraycan imantsu. Peru majayogna ticrar imaycacunapäpis yarpachacuywanmi itsanga allillarä ñacanga. Tsaymi noga yarpä tsaynö ñacananpa rantinga mejor majaynagllana täcunanta.

²⁹Waugicuna panicuna, yupashga watacunallam cay patsachöga cawantsic. Tsaynö caycappinga majayog cayman churacarpis Señorñintsic Jesucristo munangannömi cawayänaqui.

³⁰Tsaynöllä llaquicuychö carpis o cushicuychö carpis pay munangannöllä imaypis cawayay. Imata rantiycurpis ama tsay rantiyangayquillapäga yarparayaytsu.

³¹Cay patsachö imaycapis ushacaglla canganta musyaycarga ricuyarpis ama riquëzayquicunallapäga yarparayaytsu.

^{32,33}Criyicog waugicunachöpis warmiyog cagcunaga mas yarpachacuyan warminwan alli cawayänapä cagtam y wamrancunata shumag shacshatsiyänapä cagtam. Nagana “Diosta sirvishä” nir mana warmicog cagcunam itsanga Diosta sirvinanpä cagllatana yarpachacuyan. Tsaynö caycappinga mas allim canman warmiynaglla täcuyaptiquipis.

³⁴Tsaynöllam jipashcunapis majaynaglla cagcunaga Diosta sirvinanpä cagllatana yarpachacuyan. Majayog cag warmicunam itsanga gowanwan alli cawanapä cagcunata yarpachacuyan.

³⁵Tsaynöga nimü manam majayog cayänaquipä cagta michäcurtsa, sinöga majayog cayänaquipä o majaynag cayänaquipäpis shumagrä yarpachacuyänaquipämi. Imanö carpis

llapayqui Tayta Dios munangannöllä cawayayga.

³⁶Tsaynö captinpis juc runa ashicungan jipashwan täcuytana munarga täcunmannam. Tsaynö majayog cayman churacar manam ima jutsatapis ruraycantsu. ³⁷Peru warmiyog cayta mana munar japalla cay paypä allinö captinga mejor ama ashitsuntsu.

³⁸Tsaynö captinpis ashicungan warmiwan täcuptinga allillam, ni warmiynaglla täcuptinpis allillam. Peru mas allega canman majaynaglla Diosnintsicta sirvir täcuymi.

³⁹Juc gowayog warmi gowan cawaycappinga manam gowanpita raquicanmantsu. Gowan wanucuyuptinmi itsanga librina caycan juc criyicog mayinwan täcunanpäpis. Jesucristuman mana criyicogwanga manam tanmantsu. ⁴⁰Imanö captinpis nogapa yarpaynipita viüdayarga mananam yapapacunmannatsu. Tsaynöga gamcunata nicä Espiritu Santuta chasquicushga carmi.

**Runacunawan goricar idulucunapa
altarninchö pishtayangan aytsata
mana micuyänapä ningan**

8 ¹Waugicuna panicuna, gamcuna tantiyayanquim *idulucunapa altarninchö pishtayangan aytsa micuy jutsa mana canganta. Tsayta tantiyarpis tsay micucunaman micog aywar waquin criyicog mayiquicunatam llaquicatsiyanqui. Llaquicatsiyänaquipa rantinga yarpachacuyay jutsaman ishquiyäcayangayquita yarpar llaquicuyanganta.^d ²Tantiyacog

d 8.1 Tsay witsanga Diosnintsicta mana chasquicog runacuna ima fiestata rurarpis idulucunatam adorayag. Tsaynö adorarmi idulu churaräcunan altarninchö ima ashmatapis pishtayag jinanchö micupacuyänapä. Tsaynö rurayag idulucuna Dios canganta yarparmi. Corinto marcachö Jesucristuman criyicogcuna tsay fiestacunaman aywarmi waquincuna niyag alli canganta y waquincunanam niyag mana alli canganta. Tsaymi alli canganta o mana alli canganta musyayta munar apostol Pabluta tapucur cartacuyargan.

cayangayquita yarparpis criyicog mayiquicunapa ricananchö tsaycunata rurarga musyag tupaycäyanquim.

³Criyicog mayiquicunapä yarpachacuyaptiquega Diosnintsic imaycachöpis yanapayäshunquim.

⁴⁻⁶Jesucristuta mana chasquicog waquin runacunaga yarpäyan ciëluchöpis y cay patsachöpis imaycaläya dioscuna cayangantam. Tsaynö yarpäyaptinpis imaycawan munayyog Tayta Diosga jucllayllam. Paypita masga mananam juc diosga cannatsu. Tsaynö caycaptinga manam ñdulucunatsu cay patsata ni ciëluta camashga, sinöga Jesucristuwan Tayta Diosmi llapan imaycacunatapis camashga. Tayta Diosmi nogantsictapis camamarguntsic Jesucristo munanganta rurarnin cawanantsicpä. [ñdulucuna munayyog mana captinmi altarninchö pishtayangan aysata micuyangayqui mana jutsatsu.]

⁷Tsay aysata micuyangayqui alli canganta niyaptiquipis waquin criyicogcunaga jutsa cangantam yarpäyan. Paycunaga Jesucristuta manarä chasquicushga carmi tsay micucunata micur cacur ñdulucunata adorayargan. Tsaymi Jesucristuta chasquicushgana caycarpis tsay micucunata yapay micur yarpäyan ñduluta adoragnölla jutsata ruraycäyangan.

⁸Tsaynö yarpäyaptinpis waquinniquega tantiyayanqui tsay micucunata micurpis jutsata mana ruraycäyanganam. Rasunpapis manam Tayta Dios salvamäshun fiesta micuyta micungantsicpitatsu ni mana micungantsicpitatsu, sinöga Jesucristuta chasquicungantsicpitam. ^{9,10}Tsaynö captinpis cay ningätaga shumag tantiyacuyay. Runacunawan goricaycur ñdulucunapa altarninchö pishtayangan

aysata micuycagta ricaycuyäshur waquin criyicogcuna yarpäyanga ñdulucunata adoraypis jutsa mana cangantam. Tsaynöpanam Jesucristuman manana yäracur canganna ñdulucunata adorayanga.

¹¹Tsaynö carnam salvacunantsicpä Señor Jesucristo cruzchö wanushga caycaptinpis mana salvacuyangatsu.

¹²Criyicog mayintsiccuna Jesucristuta gongariyānan captin tsay micucunata micurnin jutsatam ruraycäyanqui.

¹³Tsaymi gamcuna tsay micucunata micuyānayquitsu. Nogapis manam imaypis tsay micucunata micushätsu criyicog mayintsiccuna Jesucristuta gongariyānanpäga.

Apostol cananpä Pabluta Diosnintsic acangan

9 ^{1,2}Gamcunaga imanirtä ningäcunata imapäpis mana cuentayanquitsu, Jesucristupa *apostolnin mana cangäta yarpar? Nogataga quiquin Señornintsic Jesucristum yuripaycamar nimashga apostolnin canäpä. Tsaynöpanam Tayta Diospa alli willacuyunta willapapti gamcunapis Jesucristuta chasquicushgana caycäyanqui. Tsaymi apostolnin cangäta waquin runacuna mana tantiyayaptinpis gamcunaga rasunpa apostolnin cangätaga tantiyacuyānayqui.

³Gamcunapa imayquicunatapis mana mañashga captimi waquinniquicunaga niyanqui: “Pabloga Jesucristupa apostolnin mana carmi imatapis mañamantsicstu. Apostol mana captinchir imata chasquinanpäpis deréchun cantsu” nir. ⁴Tsaynö niyāmaptiquipis waquin yachatsicogcunapanöllum nogapapis deréchü can patsatsiyāmanayquipä y micuyta garayāmanayquipäpis.

⁵Musyayangayquinöpis Pedruwan waquin cag apostolcuna y Jesucristupa waugincunapis Diosnintsicpa willacuyñinta willacur puriyaptin warmincunatawanmi yanapaycäyan. Nogapapis derëchöga canmi apostol caycaptëga warmiyogta ni warmiynagtapis imallawanpis yanapayämānayquipä. ⁶O tsayöraga ñBernabepawan nogallapacu derëchücuna cantu mana yanapaycayämānayquipä?

⁷¿Pitā soldädu cayman yaycunman gastuncunapā quiquinpa gellēninta pägacuycur? Tsayñölla ñpi runatā sigapacog aywar payllayñinta mana chasquinmantsu? Y ñpitā üshayog caycar millwanta putscananpā mana rutunmantsu? ^{8,9}Tsayñöllum nogapapis derëchü can Jesucristupa apostolnin cangäpita yanapayämānayquipä. *Moises gellangan leycunachöpis cayñö nirmi gellgaraycan: “Yuntata pachan mana garaypaga ama yapyatsiyaytsu” nir. Tayta Dios tsayñöga nirgan yuntata pachan garayangayquinölla willacuyñinta willacogcunatapis yanapayānanpā cagtam.

¹⁰Arupacogcunapis aruyanganpita jornalñinta chasquiyanmi, y sigapacogcunapis payllayñintaga chasquiyanmi. Tsayñöllum Diospa willacuyñinta willacogcunapis willacuyanganpita chasquiyananpäga derëchuncuna can. ¹¹Nogacunam gamcunatapis Diospa alli willacuyñinta willapäyargö. Tsaymi nogacunatapis gamcuna imallawanpis yanapayāmanquiman. ¹²Waqin yachatsicogcunata yanapayangayquinölla nogacunatapis punta chämog caycäyaptëga imaycallawanpis yanapayāmanquimanmi.

Tsayñö captinpis noga manam imatapis mañargötsu, runacuna cayñö niyämānanta mana munar “Pabloga Diospa willacuyñinta willacuycan imatapis chasquipacunan raycullarmi” nirnin. Tsayñö nir jamuräyāmarmi waquincunaga willacungäta chasquicuyangatsu. Tsayta mana munarmi quiquicuna arucuyargö imapis gastücunapäga. Tsayñöllum maytsaychöpis Diospa alli willacuyñinta willacuycäyā imatapis mana chasquipacuyllapa pipis maypis Señor Jesucristuta chasquicuyānanta munar. ¹³Imanö captinpis ama yapäyaytsu imatapis mana miñishtiypa puriycäyangäta. Gamcuna musyayanquim *templuchö *altarta pitsapacogcuna y churapacogcunapis altarchö pishtayangan aysata micur cawayanganta. ¹⁴Tsayñöllum Diospa willacuyñinta willacogcunapis willacuyanganpita chasquiyananpäga imallapis faltānantsu. Tsayñö cananpämi Señornintsic Jesucristo yachatsicushga.

¹⁵Tsayñö captinpis noga cushicümi gamcunawan caycar imatapis mana chasquipaypa Diospa willacuyñinta willapangäta. Y tsayñö imaycawanpis yanapayämānayqui raycurtsu manam cay cartata apatsimü, sinöga Jesucristupa apostolnin cangäta tantiyacuyānayquipämi. Willacungäpita cobranäpa rantinga jina wanucümanmi.

¹⁶Nogataga Tayta Diosmi acramashga willacuyñinta willacunapä. Tsayñö acrashga caycar shumag mana willacurga allau nogallā, imanörä cashä Tayta Dios castigamaptin. ¹⁷Nogaga Señor Jesucristupa munayninchö carnin pay nimangallantam imaycatapis ruraycällä. Juc wätay päganta mana chasquiyllapa arungannöllum nogapis Jesucristupa willacuyñinta willacuycä

ima pägatapis mana chasquiyllapa. Pägapä raycullar willacurmi itsanga gamcunataga cobrämanpis cargan. ¹⁸Tsaynö mana cobrayllapa alli willacuyñinta willacupti runacuna Señor Jesucristuta chasquicuyaptin imanömi noga cushicü. Tsaymi imanö carpis mana cobrayllapa willacuycă, willapangăpita gamcuna păgayămănayqui captinpis.

¹⁹Tsaynöllam runacunapa imayca cawayñincunamanpis cawanăpă shumagră tantiyacü. Tsaynöga runacunachö cawă pipis maypis Jesucristupa willacuyñinta chasquicuyănan cashgam. ²⁰Tsaymi ari Israel runacunawan goricarpis paycuna cawayangannölla nogapis cawă. Moises gellgangan leycunata cumpliyangannöllam nogapis cumpliycă. Itsanga noga tantiyă tsay leycunata cumpliyanganllawanga mana salvacuyănanpă cangantam. Tsaynö cayaptinpis Señor Jesucristuta chasquicuyănan raycurmi paycuna imanöpis cawayangannö nogapis cawaycă.

²¹Mana Israel cag runacunawan goricarpis iwalllam paycuna cawayangannölla nogapis cawă. Itsanga paycunawan goricangă ôracuna jutsa rurayman mana ishquiypam Jesucristo munangannölla cawaycă. Tsaynöga cawaycă Señor Jesucristuta chasquicurnin salvacuyănanpămi. ^{22,23}May puringăchöpis runacuna juc imallapăpis jutsa canganta niyaptin nogapă mana jutsa caycaptinpis tsaytaga manam rurănatsu. Tsaynömi maytsaychöpis cawaycă Tayta Diospa alli willacuyñinta runacuna imaycanöpapis chasquicuyănanta munarnin.

²⁴Musyangantsicnöpis atscag runacuna llallinacuychö gănanacur

aywar mas alli cörreg cagllam premiutaga chasquin. Tsay alli cörreg cag premiuta chasquingannö gamcunapis Tayta Dios munangannö imaypis cawayay ciëluchö premiuta chasquiyănayquipă. ²⁵Cörrir llallinacuyănanpă o ima puclachöpis gănanacuyănanpăga imaycapitapis cuïdacuyanrămi gănayănan raycur. Tsaynö llallinacogcunaga pasaypa yachacur imanömi listacuycun ushacag premiullapă. Nogantsicmi itsanga imaycatapis jagiycur listacunantsic ciëluchö Tayta Diospita premiuta chasquinantsicpă cagllatana. ²⁶Cörreg mayincunata llalliya munar pasaypa cörringannö o ima gănanacuychöpis imaycanöpa llalliya munangannömi, nogapis Tayta Dios munangannö cawaycă ñöpanman char premiuta chasquinăpă. ²⁷Tsaynö captinmi imaypis shumag yarpachacuycur cawaycă. Tayta Diospa willacuyñinta shumag yachatsicurpis llutan ruraycunaman ishquirga manam Tayta Diospa ñöpanman chăshătsu.

Unay Israel runacuna Diosta mana căsucur cawayangannö mana canantsicpă yătsingan

10 ^{1,2}Waugicuna panicuna, gamcuna musyayanquim Israel runacunata unay ima păsangantapis. Paycunatam Egipto nacionpa mandunpita Tayta Dios jipimurgan. Nircurmi pucutayta yuritsipasquir tsay pucutay gepallanpa pushargan. Tsaynöllam Puca Lamartapis ishcanlăman raquisquir păsatsirgan chöpinpa llapanta. Tsaynömi ari Israel runacuna lamar chöpinpa păsar juclăya cawaymanna Moiesta gatirar aywayargan. Paycunapă tsayga cargan nogantsic Señor Jesucristuta chasquicur bautizacungantsic cuentam. ³Tsaynömi tsunyag jircacunata aywar llapancuna

micuyargan Diosnintsic camaripangan micucunatapis.^e ⁴Y nircur yacunaypita wanuyänapä caycaptinmi gagapita yacuta pashtariycatsimurgan upuyänapä.^f Tsaynömi ari tsay tsunyagcunachöpis Diosnintsicga imaycay örapis miñishtiYangancunata camaripargan. ⁵Tsay imayca milagrucunata ricaycarpis Tayta Diosta manam cäsuyargantsu. Tsaymi tsay tsunyag jircacunachö mana cäsucog cagcunata castigar ushacätsirgan.

⁶Israel runacunata Tayta Dios tsaynö castigargan nogantsicpis tantiyacurnin llutancunata mana ruranantsicpämi. ⁷Tsaynöpis Diosta imapäpis mana cuentar idulucunata ama adorayaytsu. Unay Israel runacuna örupita rurashga becërrupa imäjininta adorar jutsata rurayanganpitam Diospa palabran gellgaranganchöpis nican: “Örupita becërrutanö ruraycurmi runacunaga jamaycur micur upyar cacuyargan. Y nircur warmicunawan lluta cacuyargan” nir. Tsaynö Tayta Diosta manana cäsur cawayanganpita castiganganta ama gongashuntsu.

⁸Tsaynölla juc warmicunawan cacur ama jutsa rurayman yacuyaytsu. Israel runacuna lluta juc warmicunawanpis jutsa rurayman yacuyanganpitam Tayta Dios juc junagllachö ishca chunca quimsa waranga (23,000) runacunata ushacätsirgan.^g ⁹Tsaynöpis Tayta Dios munanganta rurayänayquipa rantin quiquiquicuna munayangayquita

ruratsiyta ama yarpäyaytsu. Unay Israel runacunatapis quiquincuna munayanganta ruratsiyta munayaptinmi Tayta Dios culebracunawan canitsiypa castigargan. Tsaynöpa maytsica runam wanuyargan.^h ¹⁰Paycunata yanapananpä Moisesa Tayta Dios churashga caycaptinpis llutancunatam parlayargan: “Moisesga llutantam ruraycan nogantsicpä” nimir. Tsaynö parlacachäyanganpitapis angelnintam cachamurgan paycunata wanutsir ushacätsinanpä.ⁱ

¹¹Unay Israel runacunata Tayta Dios tsaynö castiganganmi gellgaraycan canan nogantsicpis tantiyacunantsicpä. Llutanta rurayanganpita paycunata castigangannölla nogantsictapis castigamäshun Diosnintsicga mana cäsushgaga. ¹²Tsaynö caycaptiniga shumag tantiyacuyay jutsa rurayman mana ishquiyänayquipä. Alli cayangayquita yarpay caycäyanganquitatä jutsa rurayman ishquicurpuyanquiman. ¹³Jutsaman ishquitsimänapäga cay patsachö imaycallapis caycanmi. Peru Tayta Diosman yäracushgaga imayca jutsa ruraycunapitam imaypis tsapämantsic. Payman yäracogcunataga mana dejaypam yanapamäshun imayca jutsa ruraycunaman mana ishquinapä.

**Idulucunata mana
adorayänapä willangan**

¹⁴Israel runacuna idulucunata adorayanganpita Tayta Dios castigashga

e 10.3 Tsunyag jircacunata aywar Israel runacuna Diosnintsic camaripangan micucunata micuyangan cagpita musyanayquipä liyinqi Exodo 16.4-31. **f 10.4** Israel runacuna upuyänapä Diosnintsic gagapita yacuta pashtariycatsimurganpita musyanayquipä liyinqi Exodo 17.1-7 y Numeros 20.2-13. **g 10.8** Israel runacuna jutsa rurayman yacuyanganpita Tayta Dios juc junagllachö 23,000 runacunata ushacätsingan cagpita musyanayquipä liyinqi Numeros 25.1-9. **h 10.9** Tayta Dios Israel runacunata culebracunawan canitsiypa castigangan cagpita musyanayquipä liyinqi Numeros 21.4-7. **i 10.10** Israel runacuna parlacachäyanganpita Tayta Dios angelninwan paycunata ushacätsingan cagpita musyanayquipä liyinqi Numeros 14.1-38 y 16.41-49.

caycaptinga gamcunapis, waugicuna panicuna, tsaynö llutancunata ama rurayaytsu. ¹⁵Alli yarpayyog runacuna caycarga tantiyacuyanquimanmi cay nimungä rasun cag canganta. ¹⁶Santa Cënachö vïnuta upur y tantata paquipanacur ñllapantsicpis manacu yarpaycantsic Señor Jesucristo nogantsicpä raycur yawarninta jichar cruzchö wanunganta? ¹⁷Tsaychö maytsicag carpis juc tantallata micupacur Diosnintsicta adorarnin jucllayllanöllum caycantsic. ¹⁸Tsaynömi Israel runacunapis Tayta Diosta adoracuyänan altarchö pishtayangan aytsata micupacurnin llapanpis jucllayllanölla caycäyan. Y tsaynöllum gamcunapis runacunawan goricar idulucunapa altarninchö pishtayangan aytsata micurga idulucunata adoragcunawan jucllayllanölla caycäyanqui. Tsaynö caycaptinga paycunawan goricar ama micuyaytsu tsay aytsata.

¹⁹Idulucunapaga manam ima poderninpis cantsu. Tsaymi altarninchö idulucunata adorarnin ashmata pishtayaptinpis tsay iduloga ni imachöpis yanapantsu. ²⁰Tsaycunata rurarnin manam idulucunatatsu adoraycäyan, sinöga *supaycunatam. Tsaynö caycaptinga gamcunapis tsay micucunata micur supaycunata adorag cuentanam caycäyanqui. Nogaga manam munätsu tsaycunata rurayänayquita. ²¹Santa Cënachö vïnuta upucarga ñimanirtä Jesucristuman mana criyicog runacunawan goricar idulucunata adorayänapä apayangan vïnuta upucäyanqui? Tsay vïnuta upurga supaycunatam adoraycäyanqui. Tsaynöpis Santa Cënachö tantata

micucyarga ñimanirtä waquin runacunawan goricar idulucunapa altarnincunachö pishtayangan aytsata micucyäyanqui? Tsay aytsata micurga supaycunatam adoraycäyanqui.

²²Tsaycunata rurar cacurga Tayta Diosta pasaypam rabyanaycätsiyanqui. Tsaynö rabyanätsiyanayquipitaga Tayta Dios castigunwanmi ushacätsiyäshunqui.

²³Tsay aytsata micuyänayquipä libri caycarpis ama gongayaytsu micuyaptiqui criyicog mayiucuna jutsata rurayangayquita yarpäyänanpä cagta. Jutsata rurayangayquita yarparga ñgammcunapita imatarä yachacuyanga Tayta Dios munangannö cawayänapä? ²⁴Tsaynö captinga ama quiquillayquicuna allichö cayänayquipä yarpachacuyaytsu, sinöga criyicog mayiucunapis allichö cayänanpä yarpachacuyay.

²⁵Mercädupitapis/ maypitapis aytsata rantir idulucunapa jutinchö pishtayanganta o mana pishtayangantapis mana tapupacuyllapa micucuyay. ²⁶Cay patsachö cagcunaga imaycapis Tayta Dios camangallanmi. [Tsaynö paylla camashga captinmi llapanpis micunantsicpäga allilla caycan.] ²⁷Tsaymi pillapis micuyänayquipä gayatsiyäshuptiqui mana tapupayllapa garayäshungayquitaga micucurcuyanqui. ^{28,29}Peru tsay gayatsiyäshogniqui Diosta mana cäsur idulucunapä jutitsaycur rurayanganta willayäshuptiqui itsanga ama micuyanquinats. Willaycäyäshuptiquirä tsay micuyta micuyaptiquega gayatsiyäshogniqui runam yarpanga gamcunapis tsay idulucunata adorarna micucyängayayquita.

j 10.25 Corinto marcachöga Diosman mana criyicogcuna ima ashmata pishtarpis iduluncunapa jutinchörämi pishtayag mercäduchöpis ni maychöpis.

Imanö captinpis waquinniquicunaga nianqui: “¿Imanirtä imaycatapis micucümantsu, runacuna llutanta yarpäyangallanpita? ³⁰Llapan micuytapis camaripämanganpita Tayta Diosta agradesicur micuptëga, ¿imanirtä pipis jamuräyämänman?” nir. ³¹Tsay micucuyangayquicuna alli canganta yarpäyaptiquipis waquin runacunaga yarpäyanga supaycunata cushitsir ruraycayangayquitam. Tsaynöpam Jesucristuta chasquicuyangatsu. Tsaymi micurpis, upurpis, y imata rurarpis Señor Jesucristuta runacuna chasquicuyänapä allillata rurayänayqui. ³²Jesucristuta chasquicuyänap caycaptinga ama imatapis llutallaga micuyaytsu ni rurayaytsu, Israel runacuna captinpis ni mana Israel runacuna captinpis. Tsaynöpaga waquin criyicogcunapis Jesucristuta gongasquir yapaymi idulucunata adorayanga. ³³Tsaynö captinmi nogapis cösarä yarpachacü ima micuycunata micunäpapis o mana micunäpapis. Manam llutallaga imapis alli ruraytsu. Imaycatapis noga rurä alli cagllatam runacuna Jesucristuta chasquicur salvacuyänapä.

11 ¹Señor Jesucristuta cäsür noga cawangänölla gamcunapis pay munanganta rurayay.

**Tayta Diosman mañacur
goricäyanganchö Corinto
warmicuna umancunata
shucutacuyänapä Pablo yätsingan**

²Gamcuna imaypis yarparäyämaptiqui feyupam cushicü. Tsaynöllam cushicü Señor Jesucristupä yachatsingäta mana gongayangayquita. ³[Tsaynö captinpis gamcunachö waquin warmicuna gowancunata mana cäsürshi caycäyan.] Warmicunaga gowanpa mandunchömi cayänap. Tsaynöllam ollgupis

Jesucristupa mandunchö caycan, y Jesucristupis Tayta Diospa mandunchömi caycan.

⁴Goricäyangayquichö üsuyquicunaman Tayta Diosman mañacur o willacuyñinta willacur juc ollgu manam umanta shucutacunmantsu. Ollgucuna umata shucutacurcur Tayta Diosman mañacurga Jesucristuta manam imapäpis cuentaycantsu. ⁵Warmicunam itsanga Tayta Diosman mañacur o willacuyñinta willacur goricäyangayquichö umancunata shucutacuyanman. Üsuyquicunaman umanta mana shucutacurga gowanta manam respitaycantsu. Umanta mana shucutacurga tsay warmi agtsanta rutucureg cuentam pengacuytä caycan. ⁶Umanta shucutacuyta mana munag warmega mejor agtsanta rutucuritsun. Y si agtsan rutucushga cayta pengacurga umanta shucutacutsun.

⁷Ollguta camar Tayta Dios quiquin niragllatam camargan. Tsaymi goricäyangayquichö Tayta Diosta alabar umancunata ollgucuna imawanpis shucutacuyanmantsu. [Warmicunam itsanga gowanpa munayninchö car üsuyquicunaman umancunata shucutacuyänap.] Tsaynö shucutacunman ollgupita warmita Tayta Dios camashga captinmi. ⁸Manam warmipitatsu ollguta Tayta Dios camargan, sinöga ollgupitam warmita camargan. ⁹Y manam warmi japallanrä caycaptintsu ollguta camargan, sinöga ollgu japyallallan captinmi majanpä warmita camargan. ¹⁰Tsaymi üsuyquicunaman warmicunaga Tayta Diosman mañacur goricäyangayquichö umancunata shucutacuyänap gowanpa munayninchö carnin. Tsaynö cayaptinga angelcunapis cushicuyanmi. ¹¹[Tsaynö captinpis ama yarpäyaytsu warmicuna mana väleg cayanganta.]

Cay cawaynintsicchöga warmipis ollguwanmi alli cawayta tarin, y ollgupis warmiwanmi alli cawayta tarin. ¹²Musyantsicmi ollgupitarä warmita Tayta Dios camanganta y tsaynöllam musyantsic warmipitarä ollgupis yuringanta. Tsaynö llapanpis cananpäga Tayta Diosmi camacätsirgan.

¹³Waugicuna panicuna, Tayta Diosman mañacur goricäyangayquichö warmicuna umancunata shucutacuyänanmi. Tsaynö caycaptin ñallitsurä canman warmicuna umancunata mana shucutacuyllapa cayaptin? ¹⁴Ollgucunaga ata agtsashga carnin pengacuypämi cayan.

¹⁵Warmicunatam itsanga agtsancunarä warmi cayta shumag patsarätsin. Ata agtsayog carga tsay agtsallanwanmi warmega shucutacushganö caycan.

¹⁶Tsay üsuyquicunapä manam masta parlayta munätsu. Imanö captinpis cay nimungäta shumag tantiyacuyay. Tayta Diosman mañacuyangayquichö warmicuna umanta shucutacuyanmi. Maytsaychö criyicogcunapis tsaytaga tantiyayanmi.

Santa Cënata shumag celebrayänapä tantiyatsingan

^{17,18}Gamcunaga Santa Cënata celebrayänayquipä goricäyangayquichö gallayätsinacurshi caycäyanqui. Rasunpapis tsaynömi may portacuycäyanqui. Santa Cënachö llutan rurag cayaptiquega manam gamcunata “Allitam ruraycäyanqui” nïmansu. ¹⁹ÑImaycatä päsaycun gamcunawan? Tsaynö gallayätsinacurchir alli cawaycäyanqui, ñau?

²⁰Tsay Santa Cënata celebrayänayquipä goricar gallayätsinacuyangayquiwan manam Diosnintsic munangannönsu ruraycäyanqui. ²¹Tsay

goricäyangayquichöshi waquinniquega alli micucunata apaycur micucuyanqui. Pobri cagcunanash tsaynö micucuyaptiqui munapar ricaraycäyashunqui. Mallagar caycäyaptinpis pachayquicuna juntanganyagräshi micur cacuyanqui. Y waquinniquicunaga machag machag upyarshi cacuyanqui. ²²Tsaynö carga ñima allitatä ruraycäyanqui? Waquin criyicogcunata tsaynö munapätsiyänayquipa rantin ñimanirtä wayiquicunachö micucuyanquitsu? Tayta Diosta mana cäsurnin ñimanirtä gamcuna micuyninag cag criyicogcunata munapätsir pengacatsiyanqui? Tsaynö cayangayquipita “Allitam ruraycäyanqui” niyashayquitsu manam.

Santa Cënachö discipuluncunawan Jesucristo caycanganta tantiyatsingan

(Mateo 26.26-29; Marcos 14.22-25; Lucas 22.14-20)

²³Santa Cënapita Señornintsic Jesucristo yachatsingantam nogapis tantiyaycätsi. Wanutsiyänapä Judas entregangan tsacaymi Señor Jesus tantata aptarcur Tayta Diosta agradebicurgan.

²⁴Nircurmi tsay tantata paquirir nïrgan: “Cay tantaga cuerpümi. Cay tantata micur imaypis yarpäyanqui gamcuna raycur wanungäta” nir. ²⁵Merendata micur ushasquirnam vinuyog väsuta aptarcur nïrgan: “Cay vïnuta upur imaypis yarpäyanqui gamcuna raycur yawarnïta jichangäta. Tsaynö jichapïmi Tayta Dios runacunawan *mushog conträtuta ruranga nogaman criyicamog cagcunata jutsancunapita perdonanapä” nir. ²⁶Tsaynö ninganpitam Señornintsic cutimunganyag Santa Cënata micur upur yarpantsic nogantsic raycur cruzchö wanunganta.

**Jutsata rurarcu Santa Cënata mana
micuyänanpä ningan**

²⁷Pipis manacagcunata rurarcu Santa Cënata micur upurga mas jutsayogmi ricacun. Tsaynö rurarmi Jesucristo wanunganta ni imapäpis cuentayantsu. ²⁸Tsaymi Santa Cënata micuyänayquipäga shumagrä tantiyacuyänayqui imanö cawaycayangayquitapis. ²⁹Llutancunata rurarcu Señornintsic wanunganta imapäpis mana cuentar Santa Cënata celebrayaptiquega Tayta Dios feyupam castigayäshunqui. ³⁰Tsaynö cayangayquipitash waquinniquicunaga mana alliypana geshyaycäyanqui y waquincunash wanuyashgana.

³¹Tsaymi Santa Cënata micuyänayquipäga shumagrä tantiyacuyänayqui jutsayquicunata. Perdonta mañacuyaptiquega Tayta Dios manam castigayäshunquitsu. ³²Nogantsictaga castigarpis castigamantsic llutan ruraycunata jagirinapämi. Tsaynö llutan ruraynintsicunata tantiyacur jagirishgaga Tayta Dios infiernumanga mananam gaycamäshunnatsu.

³³Tsaymi, waugicuna panicuna, Santa Cënaman goricayangayquichö jucniqui jucniquicunapis shumag ricanacuyanqui.

³⁴Tsay goricayangayquichö waquinniquicuna mallaganarnin punta puntata micuyänayqui captinga mejor wayiquicunachö micucarcayämunqui. Tsaynöpäga Tayta Dios manam castigayäshunquinatsu.

Tsaypita mas waquin asuntucunataga shamurnam arreglashä.

**Espiritu Santo imaycanläyapa
yanapamangantsicta willangan**

12 ¹Waugicuna panicuna, cananga Espiritu Santo imanö yanapamangantsictapis shumagmi tantiyatsiyäshayqui.

²Musyangayquinöpis Jesucristuta manarä chasquicurninga gamcunapis waquin runacunanöllarämi idulucunata “Cayga diosnimi” nir adorarnin cawacuyarguyqui. ³Tsaynö cawashga carmi waquinniquicunaga tantiyayanquirätsu picuna Espiritu Santuta chasquicushga cayanganta y picuna mana chasquicushga cayanganta. Jesucristuta chasquicur munayninchö cawagcunaga llapanmi Espiritu Santutapis chasquicuyashgana. Y Jesucristuta imapäpis mana cuentagcunaga pipis manam Espiritu Santuta chasquicushgatsu.

⁴Espiritu Santoga imayca graciante gomantsic jucnöpa jucnöpapis.

⁵Señornintsic Jesucristunam llapantsictapis imaycamanpis camacätsir churamantsic payta sirvinantsicpä. Tsaymi yarpäyanayquitsu Señornintsicta waquincunalla sirviycayanganta. ⁶Tayta Diosga imaycanöpa llapantsictapis graciante gor yanapamantsic munanganta ruramantsicpä. Ama yarpäyanquitsu waquin criyicogcunallata yanapaycanganta. ⁷Llapantsictam jucnöpa jucnöpapis Tayta Dios Espiritu Santunwan yanapatsimantsic nogantsicpis criyicog mayintsicunata yanapanantsicpä.

⁸Waqin criyicogcunata Espiritu Santo yanapan shumag tantiyacurcu waquincunatapis tantiyatsiyänanpämi. Y waquintanam Espiritu Santo yanapan shumag yachacunanpä, nircur waquin cagcunatapis yachatsinanpä.

⁹Tsaynöllam waquin cagtapis Espiritu Santo yanapan Tayta Diosman yäracur imaycapäpis mañacunanpä, geshyagcunata allitsinanpä,

¹⁰milagrucunata rurananpä, y Diospa willacuyinta musyatsicunanpä.

Tsaynöllam waquincunatapis Espiritu

Santo yanapan manacagcunata parlaycayanganta tantiyacunanpä, mana yachangan parlaycunachö willacunanpä, y nircur willacungancunata quiquincunapa parlayninchöna tantiyatsinanpä. ¹¹Tsaynömi ari Espiritu Santo poderyog car criyicogcunata jucnöpa jucnöpapis yanapan. Tsaymi llapantsictapis quiquin Espiritu Santo munanganllaman yanapamantsic waugintsiccunata yanapanantsicpä.

Jesucristupa cuerpun cangantsicta tantiyatsingan

^{12,13}Musyantsicmi juc runapa ricancuna, chancancuna, y umapis juc cuerpullachö canganta. Tsaynöllam Espiritu Santuta chasquicushga cagga llapantsicpis jucllayllanöllana caycantsic. Tsaynö carnä Jesucristupa cuerpunna cantsic, Israel runa carpis y mana Israel runa carpis, pipa escläwun carpis y mana escläw carpis.

¹⁴Runapa umanwan, chancanwan, maquinwan, llapanwanrämi juc cuerpoga ruracan. ¹⁵Chaquintsic manam cuerpuntsicpita yargucunmantsu: “Noga maqui mana caycarga manam cuerpuchötsu cä” nir. ¹⁶Tsaynölla rinrintsicpis manam cuerpuntsicpita yargucunmantsu: “Noga ñawi mana caycarga manam cuerpuchötsu cä” nirmän. ¹⁷Cay cuerpuntsic ñawilla captina çimawanrä wiyashwan? Y tsaynöpis cuerpuntsic rinrilla captina çimawanrä asyaytapis mayashwan? ¹⁸Tayta Diosllantsicga yarpanganmanmi imaycayogta camamarguntsic umayogta, ricrayogta, y chancayogta. ¹⁹Imanörä cashwan cargan umantsiclla captin o chancantsiclla captin! ²⁰Peru Tayta Diosga llapanyogtam camamarguntsic juc cuerpulla cananpä.

²¹Manam ñawintsicpis maquintsicta ninmantsu: “Manam gamta miñishtütsu”

nir. Tsaynöllam umantsicpis chaquintsicta ninmantsu: “Manam gamta miñishtütsu” nir. ²²Antis cuerpuntsictaga Diosnintsic camashga mas pishi töpay cagcunata y pengaynintsic cagcunata mas cuidanantsicpämi. ^{23,24}Tsaymi pishi töpay captin ñawintsicta shumag cuidantsic. Ricrantsiccunataga chancantsiccunataga manam alläpa cäsupantsicstu. Tsaynöllam pengaynintsictapis juccuna mana ricayänapä tsapacuntsic. Tsaynö tsapacurpis manam yarpantsicstu mana väleg cangantaga, sinöga tantiyantsic cuerpuntsicchö llapanpis cagcunaga väleg cangantam. ²⁵Tsaynö captinmi cuerpuntsicchö cagcunataga llapanta miñishtintsic, pishi töpaytapis o mana pishi töpaytapis, pengaytapis o mana pengaytapis. ²⁶Imaycallantsicpis nanaptinga llapan cuerpuntsictam nanantsicuntsic. Tsaynö caycangantsicpita allisquirga cushishgam ticasquintsic. [Tsaynöllam criyicog mayintsicta imapis päsaptin llaquicuntsic y Tayta Dios yanapaptinnam cushicuntsic.]

²⁷Nogantsic Jesucristuta chasquicushgana cagcunaga llapantsicpis paypa cuerpunmi caycantsic. ²⁸Tsaymi Señor Jesucristuman criyicur cawagcunata Tayta Dioslla churashga apostolcuna cayänapä, willacuyänapä, willacuyänapä, y yachatsicuyänapä. Waquincunatanam acrashga milagrucunata rurayänapä, waquintanam geshyagcunata allitsiyänapä, waquintanam pobricunata yanapayänapä, waquintanam shumag yätsicog cayänapä, y waquintanam acrashga mana yachangan parlacucunachöpis willacuyänapä. ²⁹Manam llapan

criyicogcunatatsu Tayta Diosga churashga apostolnin cayāanpā, ni willacognin cayāanpā, ni yachatsicog cayāanpā, ni milagrucunata rurayāanpā. ³⁰Tsaynōpis manam llapantatsu Tayta Dios churashga geshyagcunata allitsiyāanpā, ni mana yachangan parlaycunapa willacuyāanpā, y nircur willacungancunata quiquincunapa parlayninchōna tantiyatsināpā. [Tsaynō caycaptinga ama yarpachacuyaytsu: “Jesucristuman waquin criyicogllatam Espiritu Santo yanapaycan” nir.] ³¹Yarpachacuyayga gamcunatapis Espiritu Santo yanapayāshuptiqui criyicogcunata yanapayānayquipā cagta. Tsaycunata shumag tantiyacur cawayānayquipāmi canan noga jucta willapāyāshayqui.

**Cuyanacuy imanō canganta
Pablo tantiyatsingan**

13 ¹Cay patsachō llapan imayca parlacuycunachō parlayta yacharpis o *angelcunapa parlacuynincunata parlarpis cuyacuyta mana yacharga llapan parlangācunapis platilluta llutalla tucayaptin chinchinyangannōllam caycan. ²Tayta Diospa willacuyninta shumag willacurpis o ima pāsanāpā cagcunata musyarpis o imayca yachag runacunapita masta musyarpis cuyacuyta mana yacharga ĩmapārāchi wālīman? Tsaynōlla Tayta Diosman yāracuycur juc jircata jucaglāman witicunāpā niyucpti witicusquiptinpis cuyacuyta mana yacharga manam imapāpis wālitsu. ³Pobricunata llapan imaycācunata garar ushasquirninpis o runa mayi raycur wanuyta tarirpis cuyacuyta mana yacharga imapārāchi wālīman.

⁴Cuyacog carga runa mayintsic ashllimashgapis awantacuntsicmi.

Tsaynōmi cuyacuyta yacharga runa mayintsictaga chiquintsicstu, sinōga cuyapantsicmi. Manam musyag yachag tucuntsicstu ni runa tucuntsicstu.

⁵Manam manacagcunata llutallaga parlacuntsicstu, ni manam imaycachōpis quiquintsicpā ricogllaga cantsicstu. Manam imaycallatapis ajanaycantsicstu ni piwanpis ajātsinacurcur nanag ñawintsicpa ricapantsicstu. ⁶Llutancunata ruraptin manam pitapis cushipantsicstu, sinōga imaycacuna pāsaptinpis cuyapantsicmi. Y allicunata ruraptinga cushicuntsicmi. ⁷Cuyacog carga runa mayintsic chiquimashgapis manam wasan rimantsicstu. Jucpa wasanta rimaptinpis manam rimāshintsicstu. Llutancunata ruraptinpis tantiyatsintsicmi allillata rurar cawanāpā. Imata nimashgapis awantacuntsicmi.

⁸⁻¹⁰Cay patsachō cawar Tayta Dios imanō canganta manarā shumag tantiyacuptintsicmi Espiritu Santo yanapaycāmantsic Tayta Diospa willacuyninta tantiyanantsicpā y runacunata musyatsināpā. Señor Jesucristo goricamashgaga mananam willacushunnatsu, mana yachangantsic parlacuycunachō parlashunnatsu, ni cay patsachō Espiritu Santo tantiyatsimangantsicnō yachacushunnatsu. Tsaynō captinpis Tayta Dioswan y runa mayintsicwanmi itsanga imayyagpis cuyanacuycāshunlla.

¹¹Nogapis wamra carga wamranōllam parlargāpis y yarpachacurgāpis. Canan rucuyaptīnaga mananam wamrapanōnatsu yarpachacuynīpis. Tsaynōmi ari Señor Jesucristo goricamashgapis manana miñishtishunnatsu Espiritu Santo tsaynō yanapamānantsictaga. ¹²Cananga macwa espējuchō ricacognōpis manarāmi shumagga tantiyacuntsicrātsu

Tayta Dios imanö canganta.
Gloriachömi itsanga Tayta Dios
nogantsic imanö cangantsicta
musyangannö nogantsicpis pay imanö
canganta musyashun.

¹³Cay patsachö tsaynö llapan
ushacaptinpis mana imaypis
ushacangatsu Diosnintsicman
yäracuyinintsicmi, gloriaman
pushamänantsicpä cagta
shuyacuyinintsicmi, y
cuyanacuyinintsicmi. Tsay quimsanpita
mas väleg cagga cuyanacuyinintsicmi.

**Mana yachayangan
parlacuycunachö Espiritu Santo
parlatsingancuna**

14 ¹Waugicuna panicuna,
gamcunaga imaycanöpapis
cuyanacur cawayay. Diosnintsicta
mañacuyay alli willacuyininta pitapis
maytapis shumag tantiyaatsiypa
willapâyânayquipä. ²Runacuna mana
tantiyayangan parlaycunapa
willapâyânayquipa rantinga allim
canman quiquincunapa
parlaynincunachö Tayta Diospa
willacuyininta willapâyaptiquim. Tsaynö
willacuyaptiquega manam pipis
tantiyayâshunquitsu imata
parlaycâyanganquitapis. Tsaytaga Tayta
Diosllam tantiyayâshunqui. ³Runacuna
tantiyayangan parlaycunapa
willacuyaptiquim itsanga llapan
parlapaycangayquicunatapis
tantiyayâshunqui. Tsaymi llapan
wiyagcuna cushicur shumag
yachacuyanga Diosnintsic munangannö
cawayânanpä. ⁴Mana tantiyangan
parlaycunapa parlaparga tsay parlag
cagllam cushicun. Peru runacuna
tantiyayangan parlacuyinincunapa
willapâyaptinmi itsanga llapanpis
cushicur entiendiyanga Diosnintsicpa
munayninchö cawayânanpä.

⁵Ama yarpâyaytsu mana
tantiyayangan parlaycunachö
willacuyangayquicuna mana alli
canganta. Tsaynö parlanantsicpä
Espiritu Santo yanapamashgapis allillam
canman. Peru mas allega runacuna
tantiyayangan parlacuyinincunachö
Diospa willacuyininta parlapashgam.
Mana tantiyayangan parlaychö
willacuyaptiquega juc criyicog waugim
canman quiquincuna parlayanganman
ticratsipag. Tsaynö tantiyatseg captinga
allim canman juc parlaycunachöpis
willacuyaptiqui.

⁶Waugicuna panicuna, shumag
tantiyacuyay. Gamcunaman
watucagniquicuna shamur mana
tantiyayangayqui parlacuychö
parlapapti ñimatarä tantiyayanquiman?
Peru quiquiquicunapa
parlacuyiniquicunachö parlapaptimi
itsanga shumag chasquicuyanqui.
⁷Pincullutapis arpatapis llutalla
tucacuyaptinga manam tantiyacantsu
imata tucaycanganpis. ⁸Tsaynömi
gyërraman soldâducuna aywar
cornëtata llutalla tucacuyaptinga mana
ras listacuyanmansu pelyamanna
yaycuyânanpä. ⁹Tsaynömi criyicogcuna
goricâyanganchö mana tantiyayangan
parlacuychö willacuyaptiquega mana
tantiyar imatapis yachacuyangatsu.
Tsaynö captinmi quiquincunapa
parlacuyinincunachö mana willacurga
mana cangan cuentalla
parlacuycâyanqui.

¹⁰Musyangantsicnöpis runacuna
imaycaläya parlacuycunatam parlayan.
Y tantiyayangan parlaycunapa
parlapashgaga pipis entiendiyanni.
¹¹Nogatapis mana tantiyangä parlaychö
pipis parlapämaptinga manam
tantiyâtsu imata nicämangantapis.
Tsaynöllam mana tantiyayangan
parlaychö noga parlapaptipis imata

nicangätapis mana ichicllapis
tantiyayämantsu. ¹²Tsaynö caycaptinga
ëmanirtä yarpäyanqui runacuna mana
tantiyayangan parlaycunachöpis Diospa
willacuyñinta alli chasquiycäyanganta?
Tsaynö yarpäyanayquipa rantinga Tayta
Diosman mañacuyay runacuna
tantiyayangan parlaycunachö shumag
willacuyänayquipä. Tsaynöpaga
musyayangam Diospa willacuyñinta.

¹³Tsaynömi runacuna mana
tantiyayangan parlaychö willacurga
Tayta Diosman mañacuyay tsay
parlapayangayquicunata tantiyayangan
parlacuyman tigratsipäyanayquipä.

¹⁴Nogapis Espiritu Santo parlatsimangan
parlacuychö Tayta Diosta cushishga
mañacurpis manam tantiyätsu imata
nicangätapis. ¹⁵Tsaynö captinga manam
Espiritu Santo parlatsimangan
parlacuyllachötsu mañacushä, sinöga
tantiyangä parlacuycunachöpis Tayta
Diosman mañacuycäshämi. Tsaynöllam
Espiritu Santo parlatsimangan
parlacuyllachötsu Tayta Diostaga alabar
cantacushä, sinöga tantiyangä
parlacuycunachöpis cantacuycäshämi.
Manam runacuna mana tantiyayangan
parlayllachöga cantashätsu ni
mañacushätsu. ¹⁶Gamcunapis runacuna
mana tantiyayangan parlacuyllachö
Tayta Diosta alabayaptiquega waquin
runacuna gamcunawan iwal manam
alabayta camäpacuyangatsu. ¹⁷Pasaypa
cushicurrä Tayta Diosta alabayaptiquipis
paycunaga upällallam ricaräyashunqui.

¹⁸Gamcunata
yanapayäshungayquinöllam nogatapis
Espiritu Santo yanapaman mana
tantiyangä parlacuycunapapis Tayta
Diosta alabanäpä. Tsaynö
yanapamaptinmi Tayta Diosta
agradesicü. ¹⁹Imanö captinpis Señor
Jesucristuman criyicocuna
goricäyanganchöga manam mana

tantiyayangan parlaychöga parlapätsu,
sinöga tantiyayangan parlacuychömi
parlapä. Tsay mana tantiyayangan
parlacuychö mayläya parlaptipis mana
entiendiyaptinmi mas allega canman juc
ishcayllatapis tantiyayangan
parlacuychö parlapapti.

²⁰Waugicuna panicuna, runacuna
mana tantiyayangan parlaychö
willacurnin ëmanirtä yarpäyanqui
allita parlaycäyangayquita? Tsaynö
yarparga wamracuna
yarpaycäyangannöllaran
yarpaycäyanqui. ²¹Diospa palabran
gellgaranganchö caynömi nin:

“Israel runacunata castigarmi juclä
nacion runacunapa maquinman
churashä.

Tsay runacuna juc parlacuychö
parlapäyaptinmi ni imatapis
mana tantiyayangatsu.

Tsaynöpa castigaptipis manam
cäsuyämangatsu” nir.

²²⁻²⁵Tsay gellgarangannöllam
gamcuna mana tantiyayangan
parlaycunachö parlapäyaptiqui
runacuna Diospa willacuyñinta
chasquiyangatsu. Chasquicuyänanpa
rantinga löcuyashga cayangayquita
yarpäyanga. Paycunapa parlacuyñinchö
willacuyaptiquim itsanga tantiyayanga
Tayta Dios gamcunawan caycanganta. Y
tantiyacuyangam Tayta Diosta mana
cäsur jutsachö caycäyangantapis.
Tsaycunata tantiyacurga jutsancunapita
perdonta mañacurninmi gonguricuycur
Diosnintsicta alabayanga.

**Goricäyanganchö criyicocuna
imaycatapis patsätsiyänanpä
yätsingan**

²⁶Tsaycunata tantiyarnam cananga
goricäyangayquicunachö

waquinniquicuna cantayämunqui,
waquinniquina yachatsicayämunqui, y
waquinniquina Tayta Dios
tantiyatsiyäshungayquicunata shumag
willapäcayämunqui. Waquinniquina
runacuna mana tantiyayangan
parlaycunachö Espiritu Santo
parlatsiyäshuptiqui quiquincunapa
parlaynincunachö tantiyatsiyänqui.
Llapanpis allilla catsun tsay
criyicogcuna cushi cushi
yachacuyänapä. ²⁷Mana tantiyayangan
parlaycunachö parlarga juc ishcag
waugicunalla trocanacuypapis
parlayätsun. Y nircur juc waugina tsay
parlayangancunataga tigratsipämutsun
shumag tantiyayänapä. ²⁸Tsaychö
pillapis tantiyatsicog mana captिंगa
mejor upällacuyätsun. Mana
tantiyayangan parlaycunachö
parlapäyämunanpa rantinga
shonguncunallachöna Tayta Diosman
mañacuyätsun.

²⁹Tsaynöllä goricäyangayquicunachö
waquinniqui “Diosnintsicmi
tantiyatsimashga” nir parlamuyta
munarpis juc ishcag imalla
willacuyätsun. Nircur juccunana
tantiyatsicayämutsun tsay
willacuyangan Diospita canganta o
mana cangantapis musyayänapä.
Tsaypitana waquin waugicunapis
willacuyta munarga willapäcayämutsun.

³⁰Juccunatapis Diosnintsic
willacamunanpä tantiyatsiptinga
parlaycämog cagga upällacunmannam
jucagna parlamunanpä. Tsay waugina
willacamutsun Diosnintsic imata
tantiyatsingantapis. ³¹Tsaynöpam
llapanpis parlayta munag cagcunaga
parlayämunga criyicog mayicuna
yachacuyänapä. ³²Diosnintsic
tantiyatsiyäshungayquita
parlayämunayquipäga ama llallicuypa
llallicur parlayanquitsu, sinöga

shuyänacuyanquirä ushayämuyllanta
parlayämunayquipä.

³³Goricäyangayquichö Tayta Diosga
manam munantsu jalalaypa jalalar lluta
willacuyñinta parlayänanta. Payga
munan shumag imatapis runanantsictam.

³⁴Tsaynö captin goricäyangayquichö
warmicunaga musyag tucuyänapa
rantin upällacuyätsun. Tsaynö musyag
tucurninga gowancunata mana cäsuypa
cayangannömi caycäyan. Diospa
palabbranchö ningannöllum warmicuna
gowancunataga munaynincunachöga
catsiyänantsu. ³⁵Tsaymi
goricäyangayquichö warmicuna musyag
tucuyänapa rantin upällacuyänapa. Y
imatapis musyaytarä munarga
wayincunaman cutiycur gowancunata
tapucucuyätsun.

³⁶¿Imanirtä yarpaycäyanqui
gamcunalla Tayta Diospa willacuyñinta
yachag cayangayquita? ³⁷Diospa
willacognin rasunpa carga o Espiritu
Santo yanapayäshuptiqui yachag
cayangayquita yarparga
tantiyacuyanquimanmi cay cartachö
ningäcuna Señornintsic munangannöllä
canganta. ³⁸Cay cartachö nimungäcunata
pipis mana chasquicuptinga payta ama
cäsupäyaytsu.

³⁹Waugicuna panicuna, tantiyayangan
parlacuyñincunachö Diospa
willacuyñinta musyatsicuyay
imaycanöpapis. Imanö captinpis
runacuna mana tantiyayangan
parlaycunachö willacuyaptinpis ama
michäyanquitsu pillapis tantiyatsiyäshog
captिंगa. ⁴⁰Tsaynö llapantapis shumag
patsätsipacuyanqui Diosnintsicman
mañacur goricäyangayquicunachöpis.

Jesucristo cawamunganpä ningan

15 ¹Waugicuna panicuna, yarpäyay
Señor Jesucristupa
willacuyñinta shumag yachatsipti

chasquicuyangayquita. Tsay yachatsingäta tantiyacurmi cananga gamcuna Señornintsicman yäracur cawaycäyanqui. ²Tsaynöpam pay munangannö cawarna gloriamanmi chäyanqui. Munangannö mana cawarga manacagllapämi Señornintsictapis chasquicuyarguyqui.

³Gamcunata yachatsirgö nogapis yachacungällatam. Jutsa ruraynintsicunapita perdonamänantsicpämi Diospa palabran gellgaranganchönölla Jesucristo cruzchö wanushga. ⁴Tsaynömi Señorllantsicta pampayanganpita quimsa junagtaga cawamurgan Diospa palabran willacungannölla. ⁵Cawascamurga puntata yuripargan Pedrutam. Nircurnam yuripargan chunca ishca (12) apostolnincunata. ⁶Tsaypitanam Señorllantsic yuripargan pitsga pachac (500) payman criyicur gatiragnincuna goricashga caycäyagman. Tsay yuripangan runacunaga cay cartata gellgangä witsancunayaggpis waquincunaga cawaycäyanran. ⁷Tsaypita Santiaguta yuripasquirnam llapan apostolnincunatana yuripargan. ⁸Tsaynö llapancunata yuripanganchörämi nogatapis yuripämashga imayca llutan rurag caycaptipis.

⁹Señor Jesucristo manarä yuripämaptin nogaga payman criyicogcunata gaticacharmi ushag cä. Tsaynö caycaptipis cuyapämarnimi Tayta Dios apostol canäpä churamashga. ¹⁰Apostol canäpä churamangannöllum yanapaycäman Señor Jesucristupa willacuyñinta willacunäpä. Tsaynö yanapamaptinmi waquin apostolcunapitapis masrä willacuyñinta willacuycä. ¹¹Waquin apostolcuna willacurpis ni noga willacurpis tsay willacuyllatam

willacuycäy. Tsay willacuyllata wiyacurmi Señor Jesucristuta chasquicuyarguyqui.

Wanushgacuna cawayämunanpä cagta willangan

¹²Señor Jesucristo wanunganpita cawamushga caycaptinga ñimanirtä waquinniquicunaga wanushgacuna mana cawayämunanpä cagta parlaycäyanqui? ¹³Wanushgacuna mana cawayämunan captinga Señornintsicpis wanunganpita manam cawamunmantsu cargan. ¹⁴Tsayöraga wanunganpita mana cawamushga captinga nogacunaga llutallachi willacuyñinta willacuyäman. Tsaynö captinga Jesucristutapis chasquicuyanquiman cargan ardëllachi. ^{15,16}Wanushgacuna mana cawayämunan caycaptinga tsayöraga llullacurcuchi willacuyäman Señornintsic Jesucristuta Tayta Dios cawatsimungantapis. ¹⁷Tsaynöpis Jesucristo mana cawamushga captinga payman criyirpis jutsayquicunapita manachi perdonacar salvacuyanquitsu. ¹⁸Tsaynö captinga Señor Jesucristuman yäracuyar wanogcunapis gloriachö cayänanpa rantin infiernuchömi caycäyanman. ¹⁹Tsayöraga wanungantsicpita mana cawamunantsicpä caycaptinga Señor Jesucristuman yäracungantsicpis ñimapärächi välinman?

²⁰Waugicuna panicuna, shumag tantiyacuyay. Jesucristoga rasunpam wanunganpita cawamushga. Puntata pay cawamushga captinmi nogantsicpis cawamunantsicpä canganta musyantsic. ²¹Adan jutsaman ishquinganpitam llapan runapä wanucuy cashga. Cananga Jesucristo wanunganpita cawamushga captinmi payman criyicog cagcuna cawamushun. ²²Adanllapita mirashga carmi llapan runacunapis

wanuyanlla. Tsaynömi Jesucristo cawamushga captin payta chasquicogcunapis cawayämunga paywanna mana ushacag cawaychö cawacuyänanpä.

²³Puntataga Señor Jesucristutam Tayta Dios cawatsimushga. Y Jesucristunam ciëlpita cutimur payman llapan criyicogcunata cawatsimunga. ²⁴Tsaynö cawascatsimuptinnam Satanasta y llapan contragnincunata castiguman garpunga. Nircurnam imaycatapis Tayta Diospa munayninman entreganga.

²⁵Tayta Diospa palabran gellgaranganchöpis nican Jesucristo imaycatapis munayninchö tsarararnin chiquegnincunata castiguman garpunanpä cagtam. ²⁶Tsaypita Tayta Diosman llapanta entregaycuptinga mananam wanuytis canganatsu. ²⁷Diospa palabran gellgaraycanganchömi nin: “Salvacogpa munayninmanmi llapan imaycatapis Tayta Dios churashga” nir. (Tsaynö niptinpis Jesucristoga Tayta Diospa munayninchömi caycan.) ²⁸Jesucristupa munayninman Tayta Dios llapantapis churashga captinmi Jesucristupis Tayta Diospa munayninman cutitsinga. Tsaynöpam Tayta Dios llapan imaycatapis munayninchö tsararanga.

²⁹Waugicuna panicuna, ñimanirtä yarpäyanqui wanushgacuna mana cawayämunanpä canganta? Wanushgacunata Tayta Dios mana cawatsimunanpä caycaptinga ñimallapärä wanushgacunapa rantin waquinniquicuna bautizacuyanquipis?

³⁰Wanushgacuna mana cawayämunan caycaptinga ñimapärächi wanuyta ricarpis Jesucristupa willacuyñinta willacur puríman cargan? ³¹Tsay willacuyñinta willacur waran waran puripti hastam wanutsiyämaytapis

munayan. Imaycanö carpis salvacuyänayquipä Jesucristuta chasquicuyaptiquim feyupa cushicü.

³²Cay Efeso marcachöpis mana alli runacuna chiquiyämarninmi wanutsiyämayta munayan. Peru wanushgacuna mana cawayämunan captinga ñimapärächi tsaynö chiquishgapis puríman? Tsaynö chiquishga canantsicpa rantinga waquin runacunanöllum mejor cacushwan. Paycunaga niyan:

“Micushun, upyashun
cawangantsicyag.
Wanucurga imaycatapis
jagirishunmi” nirmi.

³³Runacuna tsaynö niyangantaga ama cäsuyanquitsu. Mana alli amigucunam mana alli nänipaga pushayäshunqui.

³⁴Shumag tantiyacur jutsa rurayniquicunata jagirirna cawacuyay. Waquinniquega jutsallachörä cacurmi Diosnintsicta chasquicuyanquirätsu. Tsaynö cawayangayquim pengacuypäga caycan.

**Wanushgacuna cawayämuptin
cuerpuncuna imanö cananpä
cagtapis willangan**

³⁵Wanushgacuna mana cawayämunanpä cagta yarparmi waquinniquega caynö nicäyanqui: “Ñimanöparä ushacashgana caycarga wanushgacuna cawayämunga? Ñawarcayämuptin imanörä cuerpuncunaga canga?” nir. ^{36,37}Tsaynö yarparga ñima ricog upa yarpaytä cayanqui? Nogantsic ima murutapis mururga manam yurantanatsu muruntsic, sinöga murutam. Tsaymi mururishga shallun cachariptin jegar gallamun, trigu carpis o ima carpis. Tsaynö jegamuptin manam patsaman

pampangantsic murutatsu ricantsic, sinöga tsay murupita yargamogtanam.

³⁸Tsaymi Tayta Dios permitingannölla tsay murucuy jatunyarcur shicshin y murücun, jara carpis o trigu carpis. Tsaynöllam nogantsicpisp tsay muru pampacärir jegarcamognö cawamurnin jucnöna cashun.

³⁹Aytsa cananpä aytsapis jucläya jucläyam, runapapis, ashmapapis, pishgupapis, y pescädupapis.

^{40,41}Tsaynömi rupaypapis, quillapapis, y estrëllacunapapis atsicaynincunaga jucläya jucläya. Tsaynöpis cay patsachö cagcunapita ciëluchö cagcunaga jucläyanam. ^{42,43}Tsaynömi cawamushgaga nogantsicpapis ciëluchö cuerpuntsic jucnöna capamäshun. Canan cag cuerpuntsicga wanurishga ismur ushacänallanpämi caycäpamantsic. Cawarcamungantsic cag cuerpuntsicmi itsanga imaypis ushacanganatsu.

⁴⁴Canan cag cuerpuntsicga cay patsachö cawanallantsicpämi. Wanungantsicpita cawamur gloriachöna canantsicpä cagmi itsanga juc cuerpuntsicna canga.

⁴⁵Diospa palabran gellgaranganchömi nin: “Allpallapita Adanta camarmi cawaynin gorgan” nir. Tsay Adanta cawaynin gongannöllam nogantsictapis Señor Jesucristo cawatsimarnintsic mana ushacag cawaytana gomäshun.

⁴⁶⁻⁴⁹Cay patsachö Adanpa cuerpun ushacaglla cangannömi nogantsicpapis cuerpuntsic ushacagllarä caycan. Gloriachönam itsanga Jesucristupa cuerpun mana ushacag cangannöna nogantsicpapis cuerpuntsic manana ushacag capamäshun. Cay vidachö cawanapäga chasquintsic ushacag cuerpullatam. Tsaypitarämi mana ushacag cuerpupita chasquishun gloriachöna imayyagpis cawacunapä.

⁵⁰Waugicuna panicuna, cay caycangantsicnö aytsantin tulluntinga

manam pipis gloriaman yaucungatsu. Cay ushacaglla cuerpuntsicga manam gloriachö cawanantsicpätsu, sinöga cay patsachö cawanallapämi. ⁵¹Ama yarpäyaytsu llapantsic criyicogcuna wanunantsicpä cagtaga. Señor Jesucristo ciëlupita cutimurmi goriycamarnintsic wanushgacunatapis cawagcunatapis mushog cuerpuyogtana wap tigrascatsimäshun. ⁵²Tsayga canga fisyu final junagchö ultimu cag cornëta tucaramuptinmi. Tsay junagmi wanushga cagcunapis mana ushacag mushog cuerpuyogna cawayämunga. Tsaynömi cawaycagcunapis Señorintsic Jesucristuta chasquicushga cagcunaga mushog cuerpuyogna ricacusquishun. ⁵³Tsaynöpam cay ushacaglla cuerpuntsic manana ushacag cuerpumanna tigranga.

^{54,55}Diosnintsic alistangan mana ushacag cuerputa chasquisquishgaga mananam wanuyis canganatsu. Tsaynö cananpämi Diospa palabran gellgaranganchöpis nin: “Wanucuy manana captin ima cushicuypärä canga llapan criyicogcunapä” nir. ⁵⁶Tsaynö Diospa palabran niptinpis Tayta Diospa mandamientuncunata mana cäsucur jutsata rurayanganpitam llapan runacuna wanucuyman chäyashga. ⁵⁷Peru cananga Señor Jesucristuta Tayta Dios cachamushga captinmi llapan criyicogcunata jutsantsicpita perdonamashga wanungantsicpita cawamushun. ¡Tsaynö perdonar salvamangantsicpita Tayta Diosllantsic imaypis agradescishun!

⁵⁸Tsaynö caycaptanga, waugicuna panicuna, Diosnintsic sirvir imaycachöpis cawayay. Tsaynöllam imaypis Diospa alli willacuyninta musyatsicuyay. Musyayangayquinöpis Diosnintsic munanganta rurangantsicunaga manam manacagllaga cangatsu.

**Criyicogcunapä ofrendata
goriyānanpä yätsingan**

16 ¹Jerusalen marcachö Señor Jesucristuman criyicogcunapä ofrendata goriyānayquipä cagtaga goriyay Galacia provinciachö caycar criyicogcunata yätsingänölla. ²Paycunata yätsirmi caynö nirgä: “Semäna arupacur gānapacuyangayquipita cada domingu ichi jipiyankui ofrendayquicuna” nir. Gamcunapis tsaynö rurayanqui noga chaycamupti listullatana entregayämānayquipä. Ama shuyarāyanquitsu noga chāmuptirä goriyānayquipäga. ³Tsay goriyangayqui ofrendata Jerusalenman apar aywayānanpä acrayay juc ishca yäracuy waugicunata. Gamcuna cagman chaycamurnam quiqui juc cartata rurashä tsay cartawan Jerusalenchö criyicogcuna shumag chasquiyānanpä. ⁴Nogapis paycunawan aywayta camacarga juntum aywayäshä.

**Juclä marcacunapapis aywananpä
Pablo yarpangan**

⁵Corintuman watucagniquicuna shamur Macedonia provinciaparämi tumamushä. ⁶Capazmi gamcunawan tamiya tiempu päsanganyagrä cashun. Tsaypita waquin marcacunamanga aywashä gamcuna despachayämaptiquinam. ⁷Gamcunaman watucagniquicuna rasllaga manam shamuyta munätsu. Señorllantsic munaptinga unayrämi tärämushun. Y tsaynömi canga. ⁸Cay Efeso marcachöga camushä Pentecostes fiesta^k ushayyagrämi. ⁹Runacuna

chiquiyämaptinpis Tayta Diosga yanapaycāmanmi cay marcachö alli willacuyninta willacunäpä. Tsay willacungäta wiya curmi atscagna runacuna Jesucristuta chasquicuycāyan.

¹⁰Waugintsic Timoteupis noganöllum Tayta Diospa willacuyninta willacur purin. Pay gamcunaman chāmuptin shumag chasquicuyanqui cushicunānpä. ¹¹Payta ama maygayquipis musyag tupāyanquitsu: “Cay jövin imatarächi musyanman” nir. Tsaynö nicachäyānayquipa rantinga shumag chasquiyankui nogacunaman cushishga cutimunānpä. Pay chāmunantaga caychö criyicogcunawan pasaypam shuyacuycāy.

¹²Gamcunata watucayäshog waquin waugicunapis shayämuptinmi Apolostapis rugacurgä gamcunaman shamunānpä. Tsaynö rugacuycaptipis pay manam camacāmushgatsu. Tsaypitarämi may shamunga.

Pablo cartanchö despodicungan

¹³Imayca mana allicunapita alcäbu cayay. Diosnintsicman yäracur imaypis cawacuyay. Tsaynölla imatapis mana mantsacuyä Tayta Diosman mañacur allillata rurayay. ¹⁴Piwan maywanpis cuyanacur shumag cawayay.

¹⁵Waugicuna panicuna, gamcuna musyayanquim Acaya provinciachö waugintsic Estefanas castancunawan puntata Señor Jesucristuta chasquicuyanganta. Tsaypitaga paycuna Diosnintsic munangannömi cawaycāyan. Paycunaga Señor Jesucristuman criyicogcunata imaycachöpis yanapaycāyanmi. ¹⁶Paytaga gamcuna cäsuyānayquim. Tsaynö

k 16.8 “Pentecostes” ningan fiesta cargan cosëcha ushaymi. Tsay fiestata rurayag Pascua fiestata rurayanganpitaga pitsga chunca (50) junag päsaquiptinmi, mäyu quilla ushay o juniu quilla gallaycunanchö.

willacogcunataga imaycachöpis
yanaparmi cäsuyänayqui.

¹⁷Gamcunapita shamogcuna
Estefanas, Fortunato, y Acaico cayman
watucayämag chaycayämuftin feyupam
cushicurgö. ¹⁸Gamcunata
cushinäratsiyäshungayquinöllum
nogatapis cushinätsir masrä
valoratsiyämashga Tayta Diospa
willacuyninta willacunäpä. Paycunataga
gamcuna respëtuwanmi ricayänayqui.

¹⁹Cay Asia provincia quinran Señor
Jesucristuman criyicogcunapis
salüdustam gamcunapä
apatsiyämushunqui. Tsaynömi
Aquilawan Priscilapis y wayinman
goricäyag criyicogcunapis gamcunapä
salüdusta apatsicayämushunqui.

²⁰Tsaynölla chasquicuyay waquin
criyicogcunapa salüduncunatapis. Y
quiquiucunapis shumag
macallapänacur saludanacuyay.

²¹Waugicuna panicuna, cay cartata
juc gellgapämashga captinpis
ushanantaga quiquimi gellgamü.

²²Pipis Señor Jesucristo munangannö
mana cawag cagga infernuman
gaycushgami canga. ¡Señorllantsic
Jesucristo cutimunganam!

²³Señorllantsic Jesucristo gamcunata
cuyapäcog cayninwan
yanapaycuyäshuy alli cawayänayquipä.

²⁴Jesucristullaman llapantsicpis
criyicog carmi cuyarniquicuna
llapayquicunata saludamü. [Tsaynö
catsun.]